




明季野聞
全







明季野聞卷之一

李溫陵傳

表 中道

李溫陵者名載贄少舉孝廉以道遠不再上公車為校官徘徊卽署間為姚安太守公為人中燠外冷丰骨稜稜性甚卞急好面折人過士非叅其神契者不與言強力任性不強其意之所欲不欲初未知有學有道學先生語之曰公怖死否公曰死矣安得不怖曰公既怖死何不學道學道所以免生死也公曰有是我遂潛心道妙久之自有所契起于語言文字之表諸執筌蹄者了不能及為守法令清簡不言而治每至伽藍判了公事坐堂皇上或寘名僧其

間簿書有隙即與叅論虛元人皆怪之公亦不顧祿俸之外了無長物父之厭圭組遂八鷄足山閱龍藏不出御史劉維奇其節疏令致仕以歸初與楚黃安耿子庸善罷郡遂不歸曰我老矣得一子勝友終日晤言以遣餘日即為至快何必故鄉也遂携妻女客黃安中年得數男皆不育軀素癯淡于聲色又癖潔惡近婦人故雖無子不置妾婢後妻女欲歸趣歸之自稱流寓客子既無家累又斷俗緣叅求乘理極其超皮剔膚見骨迫絕理路出為議論皆為刀劍上事獅子迸乳香象絕流發詠孤高少有酬其機者子庸死子庸之兄天台公惜其超脫恐子姪効之有遺棄

之病數致箴切公遂至麻城龍潭湖上與僧無念周友山
丘坦之楊定見聚閑門下鍵日以讀書為事性愛掃地數
人縛簾不給衿裾浣洗極其鮮潔拭面拂身有同水滌不
喜俗客客不獲辭而進但一交手即令之遠坐嫌其臭味
其忻賞者鎮日言笑意所不契寂無一語滑稽俳調衝口
而發既能解頤亦可刺骨所讀書皆抄寫為善本東國之
秘語西方之靈文離騷馬班之篇陶謝柳杜之詩下至稗
官小說之奇宋元名人之曲雪藤丹筆逐字離校肌髮理
分時出新意其為文不阡不陌抒其胸中之獨見精光凜
然不可迫詩不多作大有神境亦喜作書每研墨伸紙

則解衣大叫作鬼起鶻落之狀其得意者亦甚可愛瘦勁
險絕鍊腕萬鉤骨稜稜紙上一日惡頭癢倦于梳擲遂去
其髮獨存鬢公氣既激昂行復詭異斥異端者日益側
目與耿公徃復辨論每下札累累萬言發道學之隱情風
雨江波讀之者高其識欽其才畏其筆始有以多語聞當
事當事者逐之于時左轄劉公東星迎公武昌舍蓋公之
堂自後屢歸屢遊劉公迎之沁水梅中丞迎之雲中而焦
公弱侯迎之秣陵無何復歸麻城時又以幻語聞當事當
事者又誤信而逐之火其蘭若而馬御史經綸遂躬迎于
北通州又會當事欲刊異端以正文體疏論之遣金吾緹

騎逮公初公病病中復寔所作易因其名曰九正易因常
曰我得九正易因成死快矣易因成病轉甚至是逮者至
邸舍囟囟公以問馬公馬公曰衛士至公力疾起行數步
大聲曰是為我也為我取門斤來遂卧其上疾呼曰速行
我罪人也不宜留馬公願從公曰逐臣不八城制也且君
有老父在馬公曰朝廷以先生為妖人我藏妖人者也死
則俱死耳終不令先生往而已獨留馬公卒同行至通州
城外都門之牘尼馬公行者紛至其僕數十人奉其父命
泣留之馬公不聽竟與公偕明日大金吾寘訊侍者掖而
八卧于階上金吾曰若何以妄著書公曰罪人著書甚多

具在于聖教有益無損大金吾笑其倔強獄竟無所寘詞
大略止回籍耳久之旨不下公于獄舍中作詩讀書自如
一日呼侍者雜髮侍者去遂持刀自割其喉氣不絕者兩
日侍者問和尚痛否以指書其手曰不痛又問曰和尚何
自割書曰七十老翁何所求遂絕時馬公以事緩歸覲其
父至是聞而傷之曰吾扶護不謹以致于斯也傷哉乃歸
其骸于通為之大治冢墓營佛刹云公素不愛著書初與
耿公辨論之語多為掌記者所錄遂寢之為焚書後以時
義詮聖賢深旨為說書最後理其先所詮次之史焦公等
刻之于南京是為藏書蓋公于讀誦之暇尤愛讀史于古

人作用之妙大有所窺以為世道安危治亂之機捷于呼吸微于縷忝世之小人既倖僥喪人之國而世之君子理障太多名心太重護惜太甚為格套局面所拘不知古人清淨無為行所無事之旨與藏身忍垢委曲周旋之用使君子不能用小人而小人得以制君子故往往明而悔激而不平以至于亂而世儒觀古人之跡又概繩以一切之法不能虛心平氣求短于長見瑕于瑜好不知惡惡不知美至于今接響傳聲其觀場逐塊之見已八人之骨髓而不可破于是上下數千年之間別出手眼凡古所稱為大君子者有時攻其所短而所稱為小人不足齒者有

時不沒其所長其意大都在於黜虛文求實用舍皮毛見神骨去浮理揣人情即矯枉之過不無偏有輕重而舍其批駁譴笑之語細心讀之其破的中竅之處大有補於世道人心而人遂以為得罪于名教比之毀聖叛道則已過矣昔馬遷班固各以意見為史馬遷先黃老後六經退處士進游俠當時非之而班固亦排守節鄙正真後世監二史之弊汰其意見一一歸之醇正然二家之書若揭日月而唐宋之史讀不終篇而已兀然作欠伸狀何也豈非以獨見之處即其精光之不可磨滅者與且夫今之言汪洋自恣莫如莊子然未有因讀莊子而汪洋自恣者也即汪

洋自恣之人又未必讀莊子也今之言天性刻薄莫如韓
子然未有因讀韓子而天性刻薄者也即天性刻薄之人
亦未讀韓子也自有此二書以來讀莊子者撮其勝韻超
然名利之外者代不乏人而申韓之書得其信賞必罰者
亦足以強主而尊朝廷即醇正如諸葛亦手寫之以進後
主何嘗以意見少駁遂盡廢之哉夫六經洙泗之書梁肉
也世之食梁肉太多者亦能留滯而成痞故醫者以大黃
蜀豆瀉其積穢然後脾胃復而無病九賓之筵鷄豚羊魚
相繼而進至于海錯若江魴柱之屬樊吻裂古人患一朶
頤則謂公之書謂消積道滯之書可謂是世間一種珍奇

不可無一不可有二之書亦可特其出之也太蚤故觀者
之成心不化而指摘生焉然而窮公之所以罹禍又不自
書中來也大都公之為人真有不可知者本絕意仕進也
而專談用世之略謂天下事決非好名小儒之所能為本
捐潔自厲操若冰霜人也而深惡枯清自矜刻薄瑣細者
謂其害必在子孫本屏絕聲色視情欲如糞土人也而愛
隣光景于花月兒女之情狀亦極其賞玩若借以文其寂
寞本多怪少可與物不和人也而于士之有一長一能者
傾注愛慕自以為不如本息機忘世槁木死灰人也而于
古之忠臣義士俠兒劍客存亡雅宜生死交情讀其遺事

為之咋指砍案授袂而起泣淚橫流痛哭滂沱而不自禁
若夫骨堅金石氣薄雲天言有觸而必吐意無往而不伸
排搨勝已跌宕王公孔文舉調魏武若稚子穉叔夜視鍾
會如奴隸鳥巢可覆不改其鳳唼鸞翮可鍛不馴其龍性
斯所由焚芝鋤蕙啣力若蘆者也嗟乎才太高氣太豪不
能埋照混俗苦就囹圄慙柳下而愧孫登可惜也夫可戒
也夫公晚年讀易著書曰九正易因意者公于易大有得
舍尤人謙而今遂老矣逝矣公所表章之書若陽明先生
年譜及龍溪語錄其類多不可悉記云外史素中道曰客
謂公之于溫陵也學之否予曰雖好之不學之也其人不

能學者有五不願學者有三公為仕居官清節凜凜而吾輩隨來輒受操同中人一不能學也公不入李女之室不登治童之牀而吾輩不斷情欲未絕嬖寵二不能學也公深八至道見其大者而吾輩株守文字不得元旨三不能學也公自少至老惟知讀書而吾輩汨沒塵緣不親韋編四不能學也公直氣勁節不為人屈而吾輩怯弱隨人俯仰五不能學也若好剛使氣快意思離意所不可動筆之書不願學者一矣既已離仕而隱卽宜遁跡名山而乃徘徊人世禍逐名起不願學者二矣 急乘緩或細行不修任情適口鬻刀狼藉不願學者三矣夫其所不能學者將

終身不能學而其不願學者斷斷乎其不學之也故曰雖好之不學之也若夫幻人之談聞其既已髡髮仍進賢八十之年不忘慾想者有是哉所謂蟾蜍擲糞自其口出者也

毛太保公傳

毛先舒

毛太保公名文龍字振南萬曆四年正月十一日生於杭州錢塘松盛里美鬚目閃閃如電為人落拓不治生產好談兵嘗與人羣飲酒樓酣拍案呼曰不封侯不罷休衆皆笑之年三十走燕中不遇又之遼左遼帥收之幕下授海州軍官漸至都聞後以王化貞薦假空札數百得便宜行

事時天啓元年也公於是率麾下百九十七人東據皮島皮島者故朝鮮地其地約百餘里四面皆山陡峻惟西邊一隅可通舟楫耳公得之金復海蓋諸州俱震朝廷遂以公為正統兵賜尚方劔未幾進左都督又加太保封三世襲一子錦衣衛指揮使於是公益自奮勵築城修樓櫓立火砲為守禦具又建府鍊山立文廟設學諸生得附北直隸山東鄉試有中武者屯田鑄錢通商船為長久之計甚悉遇賊敢戰決勝屢得捷出奇無窮而神亦助之嘗戰於大后門嶺矢來如雨再易馬皆射死夜半公步而登山八廢廟顧見廡下有黑馬遂騎之出馬行甚疾敵望之皆

辟易退却天明還其軍軍士皆歡呼及下馬則一黑虎騰
跳而去皆大驚曰大將軍真天人也而丁卯冬有時貴人
膺召入都與所親客言別飲中問曰僕行矣方今以何事
為亟會此客與公私郤乃故沈吟久之曰東島大可虞時
貴額之初公所招集勇猛士已十餘萬而探聽將哨之人
又多日費朝廷數千金餉不時發公屢上疏仍不發也公
最後疏云脫使士伍一朝脫巾而呼臣雖萬死不能禁其
如國事何廷議已疑其要脅跋扈而時貴適入會素崇煥
所新起經略駐遼左時貴者陰令圖之屯田主事徐爾一
念公功高而憤朝議之多舛也不平乃上疏論不可解者

四謂關寧一鎮每歲用銀三百萬米豆一百三十萬今皮島自天啓二年至七年共銀一百五萬有奇米豆共九十餘萬耳猶紛紛然責其費之多乎此其不可解者一關寧極望不過四百里乃擁兵至一十八萬皮島所屬島嶼二十餘處浩淼一千餘里非得多兵何以守何以戰何以聯絡而相策應乎今文龍用兵財十五萬乃謂其實兵止二萬八千而餘皆虛冒錢糧也此其不可解者二文龍妻子久已歸浙或亦王翦請田宅之意而猶慮其尾大不掉者此其不可解者三既謂皮島為扼要之地而倚任文龍乃沮其餉是委之敵耳即謂文龍一身不足惜而皮島師喪

內地必危不此之慮而顧日夜以文龍為憂此其不可解者四其餘論形勢兵機之宜而極為文龍辨白者累累十二百餘言且自啟以三子一孫保文龍無他不省崇煥乃為書招公會於瓊島瓊島在皮島稍西崇煥云有密謀公坦然揚帆來且欲因是細陳宜速發軍餉狀時軍中頗以為疑請多從者公曰我大將任東隅一面役不奉詔豈敢殺我果奉詔而來雖多人何益徒滋猜貳且不聞汾陽昔赴魚朝恩之宴乎既相見瓊島一古寺崇煥謂公吾所欲與君語他人不得聞兩人各屏去騶從獨崇煥後一書生隨之崇煥顧曰此吾幕中奇謀士也常與俱因共挽手八寺

僻處而書生者狀短小有力袖短刀既入坐定崇煥故移
坐與公促膝作耳語良久忽曰吾今日欲斷將軍頭公笑
曰無謔崇煥曰奉密旨懷中出片紙示公蓋矯詔也公疑
之崇煥曰我如屈殺君一刀他日償君百刀公即下座拜
受詔涕淚無一言起拜延頸待戮書生遂出刀斬公公死
崇正二年六月五日也年五十四崇煥既殺公出獲島還
本鎮鎮邊而公有族子承祿公養以為子從公在島中官
副總兵聞變棄官欲還杭州崇煥復捕得鍛鍊之令誣服
與父文龍謀叛蓋欲借此以解已擅殺罪逼令畫招文祿
取紙筆大書岳家父子四字人皆悲憤崇煥亦變色已竟

被殺於是皮島諸將士共棺斂故主帥屍駕海船載柩東北去柩至海中不肯行船反逆而西諸將士無可如何乃共拜之而浮諸海率其衆竟東北去皮島墟矣失左臂自此始徐爾一復上疏白公寃疏八不報爾一遂掛冠去未幾軍書旁午都城大震朝廷知公實枉死又頗思其功逮崇煥磔於西市每肉落一塊則人競買而食之百刀之誓至此而符時貴人亦得罪公之用兵也嚴賞罰必信與兵士同甘苦有古名將風然恃其功能於權要絕不肖餽遺或送白銀千兩頒人參八百斤公但如其銀價報之故怒之者多亦以此致禍焉鍊山皮島俱祠祀公遠左遺民有

挈妻子來竟無所歸號泣自經於祠下者

婺州金隱君傳

林 璐

金隱君名光字公絢義烏人也少好學凡天文地理奇門遁甲曆律醫卜等書靡不畢具性好遊居家嘆息曰丈夫固跼蹐戶庭耶時熹宗時毛帥鎮東江金君附商賈舟至其地縱觀海外形勝大喜無何政府惑處士策授謀殺毛帥帥麾下枕戈又數見疑斬餉麾下舊部憤曰大將軍死一書生吾屬安向遂掠定長山五島率兵民萬餘航海歸朝而金君始罹羅矣時崇正甲戌七年即大清天聰八年也南望輒淚下南人為將領者客金君時諸道統帥智順

王等求操觚客卒不得智順王廉知知之召金君智順王
者平南王始封爵也金君佯為許諾典書記惡西僧多雜
處不與言乘間逸去國法嚴笞之百又逃縛而大創之創
愈又逃督捕者請于朝將斬之坐金君纛下帳下爭以酒
肉進金君嚼酒啖肉大笑曰速殺我吾生不歸魂歸矣智
順王大驚馳馬至若非金某君誤矣別以他囚殉舍人子
流涕謂金君曰王愛公奈何負王金君悟八謝王王大悅
凡十年王倚之如左右手然南望必淚下喜登高山觀日
瞳瞳升則大喜或悲哀雪涕以頭頰地人不測其故一日
又出遊西僧躡其後稍選騎相並望其山形盡白山腰懸

紅燈二山忽動跡之乃巨蟒也金君驚將返轡西僧曰慎
無恐吾命之退馬上嗚嗚作梵語蟒如疾風駛去金君歸
語人曰吾向惡若曹繼自今毋輕相天下士順治元年甲
申王從攝政王及恭順王懷順王八山海關會平西伯大
破賊李自成走之遂入京金君與俱入關時策馬歎息泣
下曰吾曩日冀魂歸今生歸矣未知較魂歸時何若會大
清定鼎都北京更從王定太原克延年明年下九江左寧
南全部降品隲諸降將數與金聲桓語聲桓欲得金君王
不許其後聲桓敗王笑曰吾從其請汝敗矣金君亦笑曰
聲桓不得光故至於敗又明年取湖南王與諸王會師咸

重金君王八朝改封平南王王欲叙金君功固辭已丑王
始與靖南王取廣東攻南雄取韶州襲清遠降從化始抵
廣州運籌發策敵無不知有金君者諸將欲屠城必勸王
戒止之凡二年始克廣州又二年定高廉雷瓊等州戰取
疾徐咸受成算又明年大破李定國於橫州叙平粵功當
同三品固辭不拜金君欲歸隱王卒不許王以其子尚郡
主三辭不允始成禮金君歎曰王遇我厚失我初願奈何
吾航海北渡十有一年從陸八關當時不能退今又幾何
時言未已淚下金君慈祥豈寡謀而善斷鑑龍眼崗之屠
至議勦石門佛山卒不許聞隣道誅殺某某 帳中泣曰

老革若此悖矣往者粵西陷失定南王諸將皆坐法綠國
安等東下諸將謀拒之金君曰是予敵也急書榜宥之再
請於朝未為晚其後粵西定粵東亦安潰將咸泣金君功
益著即負固如文村逾十有一年而卒降文村者故明虎
賁將軍王興所踞地也處萬山中左峭壁右大海陽為順
而實不臣羊腸鳥道刺竹叢雜即步兵短刀卒不能入思
持久困之一日興遣卒嫚罵曰若陳兵百萬奚益汝軍中
金先生自來吾降矣守陴者以告明日復嫚罵如故金君
聞之慨然請行王及鎮帥督撫大吏驚曰蠻無信奈何失
金君金君揖列座曰光應去令一騎釋甲前導傳呼曰金

先生來村口卒馳告興興曰偽耳令素間諜者占之急奔告曰果金先生興命興而八徑數里甲兵糗芟山積興出迎問曰公護騎幾何金君曰一騎興曰君何信我金君拱手曰汝先信吾安敢不信若登堂磬折如客禮王將軍從容言吾祖宗受約束為藩籬外臣於今二百八十餘年矣曩者藉兵雪故主仇感泣至再雖然興豈為降將軍耶語未竟忽一人啓扉突出則故明侍郎前兩浙督學臣王公應華也與金君有舊相持拜跪哽咽卒不能語王將軍設席時二人曰且飲一飲凡三日王將軍把盃歎曰君來興宜踐前路命五子出拜指金君曰汝曹善事汝父更酌金

君酒眦目撫鬚降席請曰興死矣興毅魄不死大書塚前
大明虎賁將軍王興之墓足矣金君瞠目錯愕應曰諾王
將軍召妻妾登層樓自焚連珠砲轟然雷震而沒越三日
金君携其五子出納敕印土田冊籍降者次茅出金君曰
興獨熱亦忠臣也吾不負死者勸王請於朝恤其五子如
其言以褒之蠻裔感泣無敢有復叛者而金君名益著金
君佐王幕始終不受官然金君隱軍中幾五十年王欲官
其子第卒不許登粵王臺凌風長嘯謂吾曩時濱海觀日
出今又濱海數數觀日出吾得跳天門依日月足矣臨死
歎息曰吾少時幾死而不畏死今老矣願逢復更死顧齧

齟以死隱忍五十年竟死矣金君未死時澹歸大師為君作留頌子傳

林潞曰金君隱者也卒不仕吾聞金君識星緯始娶婦婦亦識星緯兩人嘗私語不告人其弟輝生數為余道往事輒流涕前二年省兄歸臨發問之曰弟將隱先生仰視笑曰此豈安枕時耶輝生再問卒不語裂畫像授其弟無以網衣一贈之曰吾五十年鬚眉尚在汝寫吾像立吳山壁大江觀日出汝知兄毋相忘金君沒而澹歸子又為題像以貽其嗣君

書明亡九道人事

馮景

愛鐵道人 銅袍道人

雲南愛鐵道人少為諸生明亡即棄家為道人性愛鐵見
必膜拜頭頂肩臂以至膏背腰皆懸鐵片行路錚錚
辟穀不火食嗜飲人與之酒張口入之婦人則揮去或問
之荅曰男女可親授乎與四川銅袍道人張閑善銅袍者
聯銅片而服之遂以名常與愛鐵飲於市醉則歌嗚嗚大
慟而去

朱衣道人

朱衣道人不知何許人能九州方言及外國語明亡棄青
衿為方外遊冠漢玉冠服朱衣常自三吳走蘓門七日往

返寄人家書有驗春日戲作紙鳶長數十丈給二小兒於
上乘東風吹入雲際令兒擊金鼓以為笑樂及兒下亦不
苦風寒蓋先與二粒赤丸吞之也自言千年前曹捧日納
陳興國口中

活死人

蜀人江本實家素封明亡散家財棄妻子入終南山學仙
得其道自號曰活死人已而維廬妙高峰頂鍊金丹十年
乃成弟子百餘人惟荆溪陳留王得其術能立水面行峭
壁往來嘗駕雲一日縛虎騎田間活死人怒責之曰所貴
道者靜無為也有為則駭世豈清淨妙道哉於是陳留王

面壁三年坐活死人喜曰可授吾道矣既授乃語羣弟子
曰道有傳人吾將蛻輒掘土穴可容身者八居之命封土
毋通隙既埋羣弟子拜且呼之土中輒應三年後呼之始
無聲樹碣曰活死人之墓

宿州道人

宿州道人姓章失其名有術能役鬼鬼名柳青明末至徐
州冬月衣麻衣行大雪中人見其汗浸浸流面手揮之如
夏月皆異之徐人挈榼遊春南山聚飲道人乞焉徐人曰
吾輩携一壺酒羣飲且不足安得餘哉道人俯拾一石如
巨大掌上吹之即成無金付主人沽酒盡醉數十客壺

未竭也於是州人萬御史竒之與道人來徃一日請貸百金御史搖手道人笑曰試君耳吾自有多金招御史視榻上則皆其家中物也御史大疑道人立呼柳青送還明日萬忽死明亡道人沈於桃源後數年徐州所與飲酒人往山左見道人在泰山酒樓酣飲歌大江東云

天妃宮道人 占月道人 心月道人

明末天津衛天妃宮道人上官常明江西南昌人也有道行年六十餘明亡忽一日命其徒購真壽缸舁之庭道人八缸南面坐而試之曰正好不須更擇日以炫世去了罷即瞑目終缸停於室三年其徒素無行好飲博欲瘞其尸

以缸易酒夜啓之楞然也大驚遂生瘡毒有天津人客吳門北歸素敬道人遇於淮陰市問何日離天津道人荅云三月三客飯齋道人別時授一方曰付吾徒治其瘡客抵天妃宮始知道人亡三年矣啓缸之夕正上巳也道人同鄉有占月道人周德風字思永博學工詩出仕明亡棄官八道游廣陵許翰林師六以師禮事之教人必以忠孝年七十六預定死期端坐以化葬於金泉之麓後有所知從武當來道遇占月云將入終南乃郵書於其徒此人歸始聞占月化去也同時有心月道人姓譚名守誠湖廣鄱縣人兒時戲於庭有紺髮朱顏黃冠人廬見而異之曰此子

骨氣非凡他日可肩吾道也語畢隱形家人皆恠之明亡
遂為道人遍遊名山一日遇王崑楊真人偕往武當山傳
妙道修真三十年以龍門心印付之屬曰爾得吾道以度
人為第一義故心月遊行天下專授拔人委曲誘盜魁為
善輩心甚多止於江寧城西虎踞山之隱仙庵一日語學
徒曰某日吾將逝矣至期沐浴更衣朝叅畢偈曰一心靜
極萬緣消獨露真容月正高端坐而化康熙己巳年事

狗皮道人

明末有狗皮道人者冠道冠躡赤舄被狗皮乞食成都市
每乞輒向人作犬吠聲於是羣犬皆吠道人對吠吠且不

絕聲主人厭之急與食去道人忽作虎嘯群犬皆辟易俄而流賊張獻忠八寇道人突至馬前大作犬吠聲獻忠怒道人反走賊策馬逐之道人故徐徐行飛馬不及也獻賊益大怒自躍馬射之中其首不及反激還中賊馬馬斃獻賊駭以為神乃已他日獻僭偽號朝元朝集百官忽來道人被狗咬列班行犬吠不止獻賊怒益甚命縛之道人益犬吠俄而盈庭如數千犬爭吠合城之犬從而和之聲震天地獻賊大聲呼衆衆皆不聞蓋為犬聲所亂獻賊驚懼而退退始不聞犬聲道人亦不知何往時則有成都女子自稱鐵娘子者亦乞食於市腰纏鐵索長數百丈重千餘

斤自西門直達東關大聲呼曰鐵娘子失去鐵牛一頭報信者予錢十萬貫獻賊聞之以為妖率千騎射之矢如飛蝗卒無一中獻賊大怖歸即病未幾中創死鐵娘子後從狗皮道人仙去

周禮部傳

汪有典

公諱鑣字仲馭金壇人崇正戊辰進士歷官禮部儀制司員外郎世父尚書應秋叔父御史維持以附魏忠賢並麗逆案公深恥之通籍後即交東林矯矯樹名節由是與羣小不合又數忤執政意遂罷歸阮大鍼者故魏奄義兒屏居金陵謀復用諸名士深詆之多聚於雨花桃葉之間而

公貴為盟主大鉞以梨園子弟為間諜每聞諸名士飲酒
高會則用一二人闌入伶人別部中竊聽諸名士口語諸
名士酒酣輒戟手詈大鉞為快大鉞聞則嚼齧撻床大恨
當此之時流賊擾江北烽火及於瓜步浦口諸名士且疑
大鉞為內應刊檄討之署曰留都防亂大鉞內啣且懼獨
身逃匿於牛首之祖堂而使其腹心收買檄文愈收而布
愈廣大鉞之客語大鉞曰周鑣之名以詬公而重諸名士
黨人又以詬公者媚鑣於是大鉞惡公及諸名士次骨思
一朝得志即起大獄殺之而未有以發也甲申李賊陷北
都烈帝殉社稷馬士英擁立福王召用失職諸臣公與雷

公續祚以三朝要典力阻定策忤士英意羣小遂謂公欲迎立疏藩而士英特以邊才援起大鉞欲次茅翻逆案修要典舉朝呼為君子者爭之而街市又布滿歌謠謂必殺馬阮忌者又謂公實使之於是馬阮謀曰不逐東林諸臣則案不可翻不殺仲馭一人則東林不盡不根究迎立疏藩之名則殺仲馭為無名於是士英首劾從賊者而以公為周鍾兄法當從坐所謂迎立疏藩者南都議立君潞王有賢譽諸大臣意多主之士英獨持福王諸大臣方列福王失德事爭之而士英已與總兵高傑劉良佐劉澤清等軟血立福王矣由是益與衆正不合周鍾字介生癸未進

士假仁義以罵天下者二十年國變降賊草偽詔醜詆先
帝天下恨之司寇高公倬擒至開新竹篋對衆杖之數十
斬於市士英既刻公大鉞又自為疏購無賴子上之而一
時附奸諸人先後論劾以驗成其罪與雷公縯祚同繫刑
部獄從吏訊而捕囚諸名士校尉紛出踉蹌奔竄善類為
之一空雷公字介公太湖人崇正庚午舉人累官山東兵
備僉事十六年疏言周延儒招權納賄凡考選科道求總
兵巡撫必先通幕客董廷獻然後得之上始疑延儒放歸
復徵聽勘而賜之死以此為衆正所歸既與公同繫御史
王懷阿大鉞意上疏請斬二人吉服承旨入獄雷公謂公

曰王儼能斷我首邪公曰不斷我首吉服何為會左良玉
稱兵檄討士英罪言引用大鉞搆陷鑣續祚士英大鉞益
怒謂鑣續祚實召良玉兵趣福王賜自盡乃各作家書訖
又互書先帝遺臣四字於腹遂雉經死遺命無葬倣伍子
胥抉目遺意置棺雨花臺未浹月而留都不守矣方大鉞
之既起也欲盡殺東林復社諸人作正續蝗蝻錄蠅蚋錄
及僧大悲獄起與御史張孫振謀倡為十八羅漢五十三
叅七十二菩薩之目共千餘人思盡阱之以空天下會大
兵至而其禍始解大鉞已先士英納款從大軍取閩將踰
仙霞嶺得微疾相與親愛者謂之曰公老矣得無苦跋涉

吾等先踰嶺而姑留此調攝徐徐至福州可乎大鉞艷然
變色曰吾雖老尚能射強弓騎壯馬且今欲取七閩非吾
不可奈何而言若是復慨然歎曰此必東林復社來間我
也軍中不鮮東林為何語曰公行矣非敢相阻也明日全
軍踰嶺大鉞下馬步行趨捷若飛持鞭指乘馬者而詬曰
若等少壯男子顧不及老禿翁顧眄矍鑠軍中頗壯之行
至五通嶺則喘急氣息不相屬坐一石上遂死其家人隨
後至見之乃下嶺買棺而是時沿途居民皆奔竄徧覓無
棺越數日乃舁木葬至嶺上會天暑尸虫盈於路僅存腐
骨而已或云過嶺白晝見雷公索命頰首曰介公饒我遂

墜馬死或云大兵擗之墮巖死仍戮其屍先是崇正十六
年大鉞竄伏金陵左良兵南下大鉞颺言歸德侯方域為
內應方域亦復社中人大鉞所劫盜者也以書抵大鉞曰
僕竊聞君子處已不欲自恕而責他人以非其道今執
事之於僕乃有不然者願為執事陳之執事僕之父行也
神宗之末與大人同朝相得甚懽其後乃有欲終事執事
而不能者執事當自追憶其故不必僕言之也大人削官
歸僕時方少每侍未嘗不念執事之才而嗟惜者彌日及
僕稍長知讀書求友金陵將戒塗而大人送之曰金陵有
御史成公勇者雖於我為後進我常心重之汝至當以而

師又有老友方公孔炤汝當持刺拜於床下語不及執事
及至金陵則成公已得罪僅見方公而其子以智者僕之
夙交也以此晨夕過從執事與方公同為而父行理當謁
然而不敢者執事當追憶其故不必僕言之也今執事乃
責僕與方公厚而與執事薄嘻亦過矣忽一日有王將軍
過僕甚恭每一至必邀僕為詩歌既得之必喜而為僕貰
酒奏伎招遊舫携山屐殷殷積旬不倦僕初不辭既而疑
以問將軍將軍乃屏人以告僕曰是皆阮光祿所願納交
於君者也光祿方為諸君所詬願更以道之君之友陳君
寔生吳君次尾庶稍前乎僕歛容謝之曰光祿身為貴卿

又不以佳賓客足自娛安用此二三書生為哉僕道之兩
君必重為兩君所絕若僕獨私從光祿遊又竊恐無並光
祿辱相款八日意良厚然不得不絕矣凡此皆僕平心稱
量自以為未甚太過而執事固含怒不已僕誠無所逃罪
矣昨夜方寢而楊君文驄叩門過僕曰左將軍兵且來都
人洶洶阮光祿颺言於清議堂云子與有舊且應之於內
子盍行乎僕乃知執事不獨見怒而且恨之欲寘之族滅
而後快也僕誠與左有舊亦已奉熊尚書之教馳書止之
其心事尚不可知若其犯順則賊也僕誠應之於內亦賊
也士君子稍知禮義何至甘心作賊萬一有焉此必日暮

遂窮倒行逆施若昔日乾兒義孫之徒詐無復之容出於
此而僕豈其人耶何執事文織之深也竊怪執事常願下
交天下士而展轉蹉跎乃至嫁禍而滅人之族亦甚違其
本念倘一朝追憶天下士所以相遠之故未必不悔悔未
必不改果悔且改靜待之數年心事未必不暴白心事果
暴白天下士未必不接踵而至執事之門僕果見天下士
接踵而至執事之門亦且必隨屬其後長揖謝過豈為晚
乎而奈何陰毒左計一至於此僕今已遭亂無家扁舟短
棹措此身甚易獨惜執事收機一動長伏草莽則已萬一
復得志必至殺盡天下以酬其宿所不快則是使天下士

終不復至執事之門而後世操簡書以議執事者不能如
僕之詞微而義婉也僕且去可以不言然恐執事不察終
謂僕於長者傲故敢述其區區不宣越明年大鉞果得志
放手殺人方域幾中辟大鉞既死蕪湖沈士柱亦罹鄙禍
者為文祭之曰丙戌長至之後二日近故降大司馬阮公
之喪至自浙東蕪湖沈某辱公知最深為文以告靈曰古
稱知己重於感恩以予觀之豈獨恩為知己哉漢之有孔
融也博聞強記一代師表操非不知之唐之有顏真卿也
純忠大節爛然與日月爭光盧杞非不知之然惟知之深
故忌之愈切殺之愈速天下後世止知操杞之妬賢榮身

而不知於兩公未始不相相知也以余少賤未嘗與司馬
公謀面竊聞公以早歲掇科歷登華職中常侍之際勢中
要路與賢士君子為仇說者遂訾公為佞子獻百官劾道
之殺正人予謂不然逆焰薰灼嗣允滿天下得公不加蓋
失公不加損劾吮癰蝕痔之行媚啣憲握爵之人具翻江
攬海之才行墜石下井之事何求不遂何欲不盈而位不
過光祿雄狐九尾不得與彪虎稱雁行予以知公之迹巧
而事拙也烈皇帝手定逆案閣公封事八贊道之列終身
不盜鼎湖之後說者以公深仇先帝不復為先帝報讎予
謂不然先帝御宇使悉公智權復為採錄抑或洗滌瘡痍

涵茹包容則恩惡親仇與衆相忘久矣惟毅然不搖於群
論使公十七年林壑養其麟甲豐其羽毛得甘心快意為
殺人之具者伊誰之賜也予以知公之陽仇而陰德也公
初涉藝苑其詩文不異常人後所製詞曲奔走一世說者
謂其憤時嫉俗科諱皆指目正人予謂不然弘光半載公
所以登場塗面自為玩弄其語人曰寧使終身無子不可
一日無官與流芳遺臭語何異及逃竄鳩茲復謂敝鄉親
友我必不學伯嚭走錢塘無論功自比宰嚭作識錢塘此
語不出前史作劇者神子胥之靈以號後世公等謹邪之
魄公目不識史胸中獨有梨園稿本以國為戲予以知公

之膽大而才小也公以里閭小怨壇坫微詞殺雷公介周
仲馭復興鉤黨之獄使宇內重見范滂張儉之事騷然不
寧說者罪公流毒宗社職此之由予謂不然跡公所以見
叱者不止殺周雷一端且周雷以亢直聞天下見忌羣小
不獨一阮也阮不殺群小必殺之卽不死於阮不死於群
小設不幸賢佞並列邪正不分終令大厦莫支狂瀾失砥
迨五月十一日無補於存亡之數而後殞命報國孰春秋
之義者不責其見幾之不早則議其反正之無術故死於
阮猶愈自死也卽同難諸君子青衫牢落雕虫小技當與
草木同腐天假公手登彈墨以永其名俾異代得與尉及

同稱雖公為國謀不忠為身謀不祥而為諸君子謀則善也予以知公之事險而意厚也公聞變倡逃棄君如敵候一代共主喘於懷愍徽欽之辱說者以賣君而緩追期與誤國而趨間道律於馬同罪予謂不然公與馬密謀策如置奕棋有無君之心然馬一貪夫敗類自公出山無日不以戕賊毒螫為事馬墮其術中不覺及愧悔為所甲而事已去矣浙東一載馬尚懼然同方合志而不知輸誠納款公又先馬効之矣使公同受戮西市一生惡迹補過蓋怨天奪其魄何委質後方糜爛以死生與馬同醜行死並不與馬同榮名天實為之也又傳公騎行萬山中臨巖一

跌身首異處徙者挾其頭馬上三日而後得棺以歛公之
智能保首領於生前不能全軀於沒後誰分其尸誰傳其
首天實為之矣予以知公之意狡而神愚也是前五者其
行事皆灼然耳目議公險者予為公平之議公深者予為
公淺之議公毒者予為公厚之議公巧者予為公拙之獨
詞曲一端人或高公之才而予獨畜以俳優謂公以人國
僥倖皆坐此病雖較衆為深文然泉下有知未嘗不以予
為知言也意予謂隔縣諸生既無一日半面之交雖曾辱
品題亦無單削隻義之譏評濫施行墨不知公徙何風聞
怨毒為甚友人曰君曾於庚午闈後同座稱觴有宵人者

以聞義質公爪牙君見其評閱曾當座叱之語微及於公
其人忿而介某某謁公門墻借君為贊公於是伏欲殺之
端矣此一說也或又曰君渭陽為公鄉同籍侍御公未第
辱公推分及公為大行為給諫侍御兩榜一令往還未絕
也甲子以後公為奄私人侍御公絕不與通公又欲以故
人禮遇子子不屑仕也公於是又增欲殺之目矣此又一
說也夫士睥睨王侯莫如補衡其面辱阿瞞無人禮而操
能容之予卽小過微文刺譏又出人傳送粉飾增蓋公何
必欲置之死地若以通家子責鄙人昔秦檜之於胡安國
始未嘗不稱同黨及末路敗壞其子胡寅胡宏或和議不

合或答書甚嚴檜心雖恨之而未至於殺也然公雖欲殺
予予卽未見殺於公而以稱相知則竊附古人矣憶黨禍
初發公曾廡語坐客某某者我之門人故舊子也而中叛
之是悔罪無暇好修者也某某者是色厲內荏我能令望
塵而拜膝行而前者也某某者有小才而無用我但喪其
膽摧其肝肺使之閉門思過縮朒不得出者也惟二沈倔
強者必生致之二沈者一謂眉生一謂予也夫倔强之名
世所諱古所尊公不吝以加諸予公不可不謂知我今秋
公降後聞將有綸扉之命同人皆動色相戒復為予危之
予笑謂人曰阮生狡獪人也其於予一發不效有懈志矣

使復再為之公自度向以搏衆令力免尚得脫今將魂餘
燼自救不暇焉能鉤致周內復陷人於罪咎哉予知公之
必不為也予不可謂不知公今有人接遇之殷綢繆之素
而實汎常公操利刀設深阱致我流離瑣尾家業蕩然猶
竊附於知己之誼魂而有靈當臨風一笑也

汪有典曰嗚呼陰疑於陽必戰蓋邪正之不兩立勢固如
此然如馬阮之必死公等殊無足異而張明弼公甥周銓
公兄也亦從而擠之不可怪與諸從公執經授業者皆煽
為異言但字仲馭而不先生舉人某侍公最久蒙薦拔最
甚以北部磨勘謂不為之地呈身要人持䟽恫喝多方卑

力而致公於死宋胡紘為朱子門人謁師武夷以食脫粟飯憾之後為侍御遂附韓仇胄論朱子為偽學徽宗陷北子楞誣其謀反於金主梟僞如此况後鬼蜮乾坤崩塌職是之由予愛侯沈兩公文不惡而嚴附著於篇因嘆彼小人者笑罵雖復由人好官究亦安在無所不至則何益夫來者鑒諸

國變難臣鈔記

汪有典

雍正癸丑夏沙博士偉業出敵紙一局曰國變難臣鈔云明崇正甲申三月十九日之變其先世自燕邸創記者紙壞敗然諸諸人姓名頗完好則不無一二蠹蝕者名不全

而姓尚存也凡分目為七一日死難姓名一日刑辱姓名
一日囚辱姓名一日潛身姓名一日叛逆姓名一日受賊
官職姓名一日誅戮姓名其死難姓名自縊死者九人為
李邦華施邦耀凌義渠吳麟徵吳甘來許直成德張慶臻
輦永固其自縊為家人解救賦詩投古井死者為范景文
其自縊并妻幼女俱縊死者為倪元璐其自縊并合門縊
死為賊殺百人跪哭者為劉理順其自縊與其子新進士
章明皆縊死者為孟兆祥其同妻俱朝服飲酒自縊死者
為汪偉其於二十一日八朝回自縊死者為周鳳翔其具
衣冠赴朝內金水橋死者為金鉉其罵賊被賊殺者為宣

府巡撫朱之馮其罵賊不跪被磔罵不絕口死者為大同
巡撫衛景瑗其驅一家俱上樓放火并自焚死者為劉文
炳劉文耀凡死者二十有二人皆致命赴義爭先日月者
也其首列刑辱姓名為方岳貢夾二夾完賍三千兩不死
留用次丘瑜夾與岳貢同完賍倍之而減其六之一若雷
耀龍若郝晉王鰲永沈日彰呂兆用雖僥倖留用而夾皆
與岳貢等其夾二夾仍不留用者則有陳必謙李明睿張
鳳翔金之俊沈惟柄胡世安張忻諸人其夾二夾并其子
亦夾一夾檟一檟者為王志正其夾二夾頭檣一檣仍夾
其僕二夾奪賊刀自刎死者為張維機其以古玉杯金壺

及諸賂器丐周鍾賄王旗鼓得復授職者一為夾一夾之
湯汝成一為夾一夾之吳履中其以削髮夾二夾者方拱
乾楊昌祚衛允文劉明傑吳寧昌夾四夾追銀四萬兩死
於家者孫度夾四夾死尤慘者李士淳林增其他如陳德
純方以智王

顧鏐鄭楚勛馮垣登吳邦臣蕭時豐萬

黃熙允

張正尹趙士錦吳伯宗李起龍郝傑陸禹思鄭逢蘭范方
謝於陞陳翔林蘭友蔡國光劉中藻何肇元曹維才李逢
甲錢增鄒逢吉或夾一夾二夾不等凡夾者五十有五人
雖為人好 不類而皆不免於辱者為宋之繩削髮以楊

廷鑑周鍾力薦於王旗鼓危夾汪光緒楊若橋周亮工劉
令尹俱未來此所謂囚辱者也蔣德璟十三日辭朝出任
崇文門外鄭二陽曾櫻施元徵張伯鯨汪維欬翁希禹程
北科官偉鏐程子奇彭遇凱施开蔣臣譚良友史夏隆嚴
通林飭王崇簡所謂潛身者也其叛逆奸臣姓名則張縉
彥周奎宋企郊等四人其時以太子獻者周奎也以十九
日同太監開齊化東便二門獻城仍被夾者張縉彥也其
受賊官職姓名則劉大輦光時亨楊枝起三人倡為助餉
之說各寫五千金丐宋企郊授名台見授職梁北陽台見
凡二授兵部侍郎楊觀宗亦台見二授禮部侍郎周鍾授

檢討撰勸進表登極詔并獻下江南策逢人卽自謂牛老
師極爲歎賞者周鍾也福王南渡與光時亨武愔駢斬於
市者卽周鍾也項煜授太常丞煜門生黎志陞爲賊腹心
欲大拜之卽昌言於衆曰大丈夫名節旣不全當立蓋世
功名如管仲魏徵可也後授本職始沮喪逃歸南渡時煜
亦被人執而沈諸河死錢位坤授國子監丞初賊不用坤
丐周鍾賁緣徧文選顧楊赴部時對人曰我明日此時便
非凡人京師有不凡人傳薛所蘊授祭酒何瑞徵授教習
館元朱學顯趙京士葉初春授大理丞賀王聖吳家周授
原職董象恒楊廷鑑韓四維高爾儼陳名夏張之琦趙玉

森傳鼎銓楊名琅魏學瀛張元琳吳甬壩劉餘謨魏天賞
史可程朱積菡早王自超劉廷琮何九雲張九錫劉肇國
李化麟姚文然高行胡統虞傳學禹羅猷攸梁清標白允
謙何允光李呈祥龔鼎趙頻楊梅鶚黃燦成克鞏張端呂
宗烈劉廷諫熊文舉侯佐俱原職楊元錫孫承澤戴明說
傅振鐸時殷申芝芳高翔漢芮元益郭元金汝礪朱徽彭
琯林鳴球柳寅東陳白羽張明駿蔡鵬霄衛正國徐必泓
王于曜鄒魁明吳剛思徐家林吳元謙繆沅李之琦胡顯
李丕著張元輔呂兆龍龔彞湯有慶黃徽允吳之琦張琦
程玉成王臯黃國琦王孫憲孫以敬王甬祿吳泰來武曠

李登雲俱授職龔

授防禦使朱

授四川府尹張

家玉以建言綢三晝夜仍授原職凡為人一百有五半皆
一世知名之士也所謂誅戮姓名者首輔則陳演夾一夾
追黃金三百六十兩銀四萬七十兩連夜殺之魏藻德夾
一夾追銀一萬七千兩其妻二櫻子二夾飲水死吏部尚
書則李遇知夾二夾授一櫻追銀四萬六千兩仍夾死其
見於敝紙劄記者如此嗚呼予於甲申死難諸君子既已
考之他書之次第為之傳今復得此鈔印證之所謂信而
有徵者庶幾無憾與至於衛允文吳角壤殉揚州難曾櫻
殉桂州難張伯鯨殉揚州難各有傳傳鼎銓南還為鄉人

非笑嘗欲求一死所與揭公重熙同舉義旗死附見揭公
傳魏孺瀛欲有所為未遂自縊死無錫顧瑞徵與如皋冒
襄嘗雪其冤自有傳張家玉起兵廣東屢破龍洲時羅連
平長寧諸縣轉戰一年八據增城大兵環攻之戰十日乃
敗諸將請潰圍出家玉難曰矢盡砲裂欲戰無具將傷卒
斃欲戰無人通拜諸將赴戰塘死附見瞿公式非方以智
為僧入粵大師物色執之逼令更服則生不更則死袍帽
在左白刃在右唯其自擇以智辭左而受右帥起親解其
縛聽為僧錢澄之記一事云順治甲午方密之以智既為
僧間閑高座寺余往看之寓報恩寺坐賣卜周勿菴肆中

有老僧與同坐故中官也問余知為桐城人因曰桐城有一方以智尚在乎昔於內廷供事烈皇一日御經筵回天顏不懌忽歎曰求忠臣必於孝子之門如是者再某跪請其故上曰今早經筵上有展書官陳某乃陳某子其父巡撫河南失機問大辟繫獄候決某衣錦熏香展書朕前畧無戚容不孝如此其能忠乎某跪進曰展書舊例皆然跪進上前防有不潔之氣上觸故衣必鮮華熏香盈袖要令展書時芳香襲御座耳上曰既知此例便當辭官不然辭差可也朕聞新進士中有一方以智其父方孔炤亦以巡撫湖廣與陳某同罪下獄聞以智懷有血疏日日於朝門

外候百官過叩頭呼號求為上達此亦是人子言訖又嘆
曰求忠臣必於孝子之門未幾時釋孔昭而辟某孔昭之
得生由此外廷豈知之乎余聞其語隨到竹園說與以智
以智伏地哭失聲北向九叩頭謝恩甲午秋九月事也嗚
呼世受國恩甘心降賊吾無責焉矣為賊鉤索枉遭刑辱
生逢亂世勢難防危惟晚節末路力持人紀君子重焉若
傅魏諸公罪匪彌天悔能晚蓋固董狐之所必錄也至於
過故主之柳棺矢極口之非語者為人臣子滅理喪心雖
復舍舊從新勲業開天文章蓋代比於管仲魏徵不可同
年語矣此句塵埋篋行中且百年博士忽於蠹魚唾棄之

餘發而出之彼死難諸公精忠大節固桀驁不能汙天地
不能死埋卽無此局自當不朽而頑頓無恥者展轉寅緣
彌縫粉飾圖計且為醴泉而鴟鼠復嚇鳳凰矣則此局也
在當日為六等之刑書在異日為千秋之缺案竄不剝蝕
豈無意乎乙丑二月八日無為汪有典記

余按他書載襄城伯李國正以三事要賊禮堊烈帝遂
死帝后旁國正所舉轟烈昭著如此此欽不宜獨畧而
不書余幼時鄉先輩齊博士耕六曾為余言襄城伯事
殊偏在江西一令幕中知之甚悉曾有文以駁正惜當
時未經親授記錄今先輩去世已久無從取證矣然寧

都魏禧新樂侯傳已詳辨之其書具在無可疑者且國
正城守盡撤守禦福王時姜曰廣訟為狂禪至與險邪
貪淫之陳新甲紈袴支離之王僕倪罷貪婪無賴之史
楚陳起新並列章奏而曰其後効可觀果國正有大節
足取姜公決不違心抹殺也况譚吉璫甫松錄吳寶厓
廣園雜誌所書趙一桂莖烈帝事俱甚詳何獨無一語
及國正邪而邵長衡且云以一桂事考之襄城未嘗一
至陵下無疑而爭三大事及自殺似傳謁名節甚重未
易輕以予人也國正死帝后旁事具見無錫邵濟明李
遺聞其書順治間最先出他書遂踵而襲之正史亦據

而為斷而魏禧文集都未寓目矣吳梅村贈劉雪舫詩
云寧為英國死不為襄城生英國謂張世澤襄城則李
國正也此又又一誣矣鄒漪於失足諸人極力附會頌
颺桐城錢澄之憤惋賦詩云史家稱實錄孔子贊闕文
所以信後世豈不貴其真不見韓退之有論不敢仲天
刑與人禍言之時心神斯人腎不畏謬妄撰遺聞甲申
殉國變烈武數名臣此外毋足道表章必有因又如賣
國者丹書著國門公論豈能廢曲筆乃為原皆言此書
出意實由斯人南渡政多端綱領畧不存所載諸讜論
當時未一陳乃知紀失實總以徇交親至於閩粵事有

若夢中言年月既錯亂爵里亦紛紜是非與功罪顛倒
誰具論聞有華少吏遭斥懷怒嗔私意撰偽書詆誣無
不云儼然編堊史小人論是遵此事吾親見紀錄亦未
湮奈何當吾世親見是非翻遺聞頗流布人圖耳目新
耳目既以惑後世何所循安得有識者一見輒為焚慨
然作此詩聊以寫煩冤福王時予北京殉難諸臣謚國
正謚貞武此探摭不實之過且吳襄以賊命招降三桂
三桂不從賊遂殺襄亦非真贗殉難者而予謚忠壯當
以三桂故曲徇之卽國正可知矣宗伯顧錫疇以請削
溫體仁謚奪職而諸逆黨請表章三案諸臣各予謚蔭

祭葬當日之朝典其可信乎張捷為東林僧人逼死鷄

鳴寺楊維垣詎殉難置三棺於中庭挾二妾宵遁半

道遭仇家擊死某氏紀畧則謂兩人皆阮馬黨晚節自

全人皆異之傳聞異辭邢正史亦與死節諸公並書據

某氏言邢抑別有見而不寧唯是邢

東林寺僧名壁見陳叔峯集

予

考正史云范景文至金鉉二十有二人皆自引決其他

率委蛇見賊賊以大僚多誤國槩囚繫之庶官則或用

或否用者下吏政府銓除不用者諸儒將榜掠取其貲

大抵降者十七刑者十三福王時以六等定罪治諸從

逆者而文武臣殉難並予贈廕祭葬且建旌忠祠於都

城焉曰正祀文臣祀景文以下二十人及大同巡撫衛
景瑗宣府撫衛朱之馮布衣湯文瓊諸生許 四人曰
正祀武臣祀新樂侯劉文炳惠安伯張慶臻襄城伯李
國正駙馬都尉鞏永固左都督劉文耀山西總兵官周
遇吉遼東總兵官吳襄七人曰正祀內臣祀太監王承
恩一人曰正祀嬪人祀烈婦成德母張氏金鉉母章氏
汪偉妻耿氏劉理順妻萬氏妾李氏馮世奇妾朱氏李
氏陳良謨妾時氏吳襄妻祖氏九人曰祔祀文臣祀進
士孟章明及郎中徐有聲給事中顧鉉彭瑄御史俞志
虞總督徐標副使朱廷燬七人曰祔祀武臣祀成國公

朱純臣鎮遠侯顧肇迹定遠侯鄧文明武定侯郭培民
陽武侯薛濂永康侯徐錫登西寧侯宋裕德懷寧侯孫
維藩彰武伯楊崇獻宜城伯衛時春清平伯吳遵周新
建伯王先通安鄉伯張光燦右都尉方履泰錦衣衛千
戶李國祿十五人曰祔祀內臣祀太監李鳳翔王之心
高時明 憲章方正化張國元六人有司春秋敘祭然
顧鏐彭瑄俞志虞革特為賊拷死諸侯伯亦大半以兵
死而即中周之茂負外郎寧承烈中書宋天顯署坐于
騰雲兵馬指揮姚成知州馬象乾皆以不屈死顧未遑
贈卹也

正史解學龍傳云解學龍字右帆揚州興化人萬曆四十一年進士官刑部尚書福王時治從賊之獄倣唐制六等定罪其一等應磔者吏部員外郎宋企郊舉人牛金星平陽知府張麟然太僕少卿曹欽程御史李振聲俞上猷山西提學叅議黎志陞陝西左布政使陸之祺兵科給事中高翔漢潼關道僉事楊王休翰林檢討劉世芳十一人也二等應斬秋決者刑科給事中光時亨河南提學僉事鞏煊庶吉士周鍾兵科給事方允昌四人也三等應絞擬贖者翰林修撰魚戶兵二科都給事中陳名夏戶科給事中楊扶起

廖國隣襄陽知府王承曾天澤兵備副使原毓宗廢
吉士何孕光少詹事項煜七人也四等應成擬贖者
禮部主事王孫惠翰林院檢討梁兆陽大理寺正錢
位坤總督侍郎侯峒山西副使王秉鑑御史陳羽台
裴希度張懋爵禮部郎中劉大輦吏部員外郎郭萬
象給事中申芝芳金汝礪舉人吳達修撰楊廷鑑及
黃綽祖十五人也五等應從擬贖者通政司叅議朱
學顯諭德方拱乾工部主事繆沅給事中呂兆龍傳
振鐸進士吳剛思檢討方以智傅鼎銓廢吉士張家
玉及沈元龍十人也六等應杖擬贖者工部員外郎

潘同春禮部員外郎吳泰來主事張琦行人王于曜
行取知縣周壽明進士徐象麟及向列星李桐八人
也其留北俟後定奪者少詹事何瑞徵楊觀光太僕
少卿張若騏副使方大猷戶部侍郎党崇雅吏部侍
郎熊文舉太僕卿葉初春給事中龔鼎孳戴明說孫
承澤劉昌余必泓張鳴駿司業薛所蘊通政叅議趙
京任福修高爾儼戶部郎中衛周祚及黃紀孫襄十
九人也其另存再議者給事中翁元孟郭亢庶吉士
魯臬吳爾璵史可程王自起白孕謙梁清標楊棲鶚
張元琳呂崇烈李化麟朱積趙頴劉廷琮吏部郎中

侯佐負外郎左懋泰禮部郎中吳之琦兵部負外郎
鄒明魁行人許作梅進士胡顯太常博士龔熙及王
之牧王皋梅鶚姬琬朱國壽吳萬孚二十八人也其
已奉旨錄用者兵部尚書張縉彥給事中時敏諭德
衛允文韓四維御史蘓京行取知縣黃國琦施鳳儀
兵部郎中張振聲內閣中書舍人顧大成及姜奎林
等十人也得旨周鍾不當緩決陳名夏等未蔽厥辜
侯恂采學顯方以智吳剛思潘同春等擬罪未合新
榜進士盡污偽命不當復玷班聯令再議惟方拱乾
結納馮阮特旨免其罪明年正月學龍奉詔擬周鍾

光時亨等各加一等潘同春諸臣皆候補小臣受偽
無據仍執前律當是時馬阮必欲殺周鍾學龍欲緩
其死謀之次輔王鐸乘士英注籍上之且請停刑鐸
卽擬俞旨廩以詳慎平允士英聞之大怒然事已無
及士英暨其黨張捷楊維垣聲言欲劾學龍學龍引
疾命未下保國公朱國弼御史張孫振等詆其曲庇
徇私遂削籍大鋮既殺周鍾光時亨卽傳旨二等罪
斬者謫充雲南金齒軍三等罪絞者充廣西邊衛軍
四等以下俱為民永不叙用然學龍所定案亦多漏
網而所擬一等諸犯皆隨賊西行未嘗正刑辟也黃

繼祖沈元龍向列星李桐黃記孫襄王之牧王皋梅
鶚姬琨朱國壽其嵩孕姜荃林皆未詳其官學龍歸
南都旋失久之卒於家蓋當日之刑賞真偽有未易
核者矣

河間太守顏公傳

林 略

顏公諱允紹別號廣明復聖顏子六十五代孫也世居
曲阜曾祖經祖從麟父宏化以懿德為林廟舉事佐宗
子治祭祀及族黨家政公為季子少孤讀書攻苦舉崇
正辛未進士出知鳳陽縣鳳陽為故明豐沛凋敝特甚
公懷柔撫恤一年增戶萬餘尋調江都會流寇橫行江

淮窺揚州公與道臣鄭公二陽府臣韓公文鏡鍊兵濟
涅為戰守計賊知有備不敢逼上降勅褒美曰廣陵南
北咽喉江海魚鹽為軍國藏府資爾綢繆幸以安輯爾
祖為邦之學用紹前徽朕于爾有厚望欽哉已而內台
將八都適上遣中使楊顯名監醢政令監司以下行屬
禮諸長吏聚議未決公厲聲曰何議為寧失官毋失身
議則終當屈膝耳即治裝北行及八都累試當改官翰
林時淮安陳啓新以武舉給事吏垣慕公名欲與結納
上方諭百官戴暖耳百官皆以紹啓新獨布絮上問之
曰臣不通請謁故貧耳公聞之曰小人以細事沽名欺

君固上為甚不報謁啓新怒遂劾遷擢諸臣多大吏私
人牢罷歸公亦左遷廣平府經歷是時王師入閩所向
摧破畿輔間日相驚擾吏部請補邯鄲令上曰邯鄲畿
南重地非習兵事者不可因問前守江都者安在遂以
公應詔時公已棄官歸里卽日促裝就道預期邑人士
集城上卽譙門中莅任曰吾晝夜兼程期與趙人同死
今兵未薄城假以三日訓練城尚可保衆皆流涕許諾
卽夜部署守禦又募勇士數十人擇邑人張執塘領之
執塘故列校也次日開公帑賞賚守者難之公曰此城
失守帑藏皆予賊矣竟用金易萬緡一夕而盡夜有兩

生以索繫城堞公集衆數之曰汝為諸生當識大義乃
欲倡遁耶諸生多為丐危公曰吾方治軍當行軍法卽
拔所佩刀斬二人頭以徇衆皆悚懼用命越三日兵薄
城下驚曰向過此城數里已聞人喧今但聞鷄犬聲城
中其有異人乎留攻三日執塘來問數出頗有殺傷遂
解圍去時臨洛閼沙河縣城俱破群盜乘機竊發焚掠
村聚執塘往擒數人比至縣則瞋目箕踞曰吾高總喧
部兵也鞭之盈百遂列其罪狀聞於幕府奮督師中使
高起潛部將侯拱極敗績高起潛劾公沮撓緩師以致
轉戰墮敵上震怒詔逮公卽戰民間之空城出走將諸

闕極陳督師欺蔽狀公力阻之乃赴中丞直指訟寃始
從薄譴鐫職三級執塘被笞辱幾死公憤求歸會真三
西山多盜公被詔以郡承徃捕之與賊對壘探甲將戰
賊曰聞顏邯鄲且至今安在公自指曰邯鄲至矣賊投
戈下馬曰我曹恨不生為邯鄲民公至必能活我降者
以千數數日悉平當是時公名震畿輔間河間保定天
津諸撫軍爭欲得之時公冢子伯環家居夜夢一人僵
卧肢體糜爛不可識一人指曰此太守也及覺聞公除
知河間府潯泣不食急寓書極諫不可徃及書達公已
在河間正色曰兇輩欲吾為自全計此方百姓將安逃

乎歲壬午閏十一月王師再入關抵城下公守具精嚴
人皆恃以無恐遠近多歸之迨攻城亟公縱火其榜風
反吹火延燒城堞數十丈城上人皆死公知不可支趨
歸署中令諸僕拒門守悉集家人一室中積薪縱火火
烈公衣冠北向再拜遂自躍入僕呂有年者冒烈焰掖
公季子出上聞之嘉悼不已勅所司覈狀優恤會鼎革
遂寢公配孟孺人方公舉鄉薦孺人喜甚典簪珥佐觴
客及聞禮闈捷卧不起烟黨相賀答曰國家方多難而
遽以身許人吾滋惧焉何以賀為孺人亞聖孟子裔孫
也

林璐曰常山平原於今為烈蓋得公而三馬公令邯鄲
時慕容嚴柏齡善察休咎雖危困意氣自如及之河間
密言此城不可居公佯不省而陰使人護之出柏齡押
渾去嗚呼公明大義與城存亡壯哉與日月爭光矣畿
南人為余言公昔捕群盜盜悉降獨惟臨洛兩市墜人
無美公至咸就縛其視昌黎驅騁何如哉余故表而出
之以備信史

國初西泠諸子古文以鹿菴先生為最所著歲寒堂
存稿或譏刻劃太過時近小說家然其縱橫奇肆寫
一人一事精神奕奕凸出紙上純得子長之神自勺

庭青門外未見耦也此文為顏修來先生作顏携至
邦溝乞言於勺庭一見辭曰某無以如此固強之僅
易數字復貽書曰某卧疾必不起以不得見君為恨
江左起衰端在于矣其為名匠推服如此

蔣村

應總兵傳

鄭梁

星移物換吾慈谿遂稱節義之鄉而死于流寇者絕少
甲申京城之陷雖無一人汗偽命者亦無一人徇國難
者其受民社之寄而死獨耶陵知縣劉而強先生振之
耳先生以老諸生得一鄉舉乃能不負君父為桑梓增
輝而一時巍科穹位者率以全軀保妻子為念蓋嘗竊

歎豪傑之興斷然不必科目今年春不第南歸舟泊臨
清晤應氏朝棟朝樑兄弟出其父行畧求傳乃知流寇
之亂吾慈谿死於封疆者尚有總兵應公泰宇也公名
時盛泰宇其字世家慈谿其先有以功封廣寧衛指揮
同知者遂用世襲居三韓崇正甲申二月初五日聞賊
李自成圍太原時公以河南總兵官為山西巡撫蔡公
懋德叅軍留守太原賊傳城公率朱孔訓等迎戰殺賊
數千至夜乃罷明日又戰晉王曰賊衆我寡不如堅守
待援公曰然然須出奇計破之公登城周視賊壘夜縋
死士出城令從東南入賊果自相擊殺斬級無算生擒

賊首四人平明梟示城闕賊望之奪氣頃之風霾晝晦
公下令固守而標將張雄者素與賊通侵夜從東南角
樓發火樓積火藥烈風從之倉卒惶急雄棄間下城入
賊管風火達朝雄軍士卒皆衣賊衣立賊幟衆勢登城
時公在新南城蔡公在大南城公見城陷急馳至大南
城授蔡公鈎擁之上馬而身與賊巷戰賊稍退矣蔡公
盱在公復單騎大呼入賊隊手刃賊數百賊辟易無敢
當者遇蔡公仗鈎立於衢中公下馬扶蔡公同至三立
祠慟哭曰此一塊乾土殆吾兩人死所矣相與懷印
從容東向再拜畢公解袍帶二一繫梁左一繫梁右蔡

公就左縊身輕不死公卸所衣鐵鎧披其身蔡公死乃就右縊頃吏氣絕把總王永魁自殺先是蔡公兵備寧前一見公卽以忠義相期引為叅軍其後蔡公為太原巡撫公目詔選世冒良將調鎮要害亦至太原仍叅蔡公軍未幾以平五臺交山等寇功蔡公疏薦陞公河南總兵官將行會督師孫傳庭戰敗潼關山西震動蔡公因苦留公而軍民相聚乞留者亦萬人公遂止太原不行當是時蔡公請發禁旅請真保火營請鎮將馳援請宣秦協防請練兵京運請留晉餉疏皆奉旨下部迄無應者而賊相距堇隔一河北抵林邑保德南迄芮城蒲

坂迤袤二千五百餘里處處水堅可渡境內監司守令
多解職無來赴任者沿河守將自平原平陽二營而外
類皆守備事權輕領兵又寡蔡公憂危告疾或勸循往
例出境候代公曰此何時也而可循往例乎蔡公然之
與公同至河上檄寧武總兵周公過吉防保德以扼其
北而命公守蒲坂等處以障其南止何平陽崞嵐告急
晉王羽檄一日十數下公留馬步三營於大慶風陵等
渡留保火四營於吉鄉諸渡而自率師與蔡公馳救平
陽甫就道沿河州縣或降或潰賊長驅入境公以太原
省會要區且親藩重地乃與蔡公歛兵八保遂死之公

號識宏偉風骨峻毅事父母昏定晨省送往慎終無失
禮居恒讀古忠孝事慷慨悲歌有志士仁人之願未襲
職時曾補博士弟子髫年卽通經史百家之說為文矯
健雄古比其死也年財四十八朝棟泣謂予曰初公歛
兵八保賊以偽碑招公公立斬其死與蔡公約大小文
武官聚漢壽亭侯廟中斬通賊者殺十人仰天誓死三
軍感泣反賊圍城公謂所親王體元曰吾府四圍可積
薪事急當然我妻子否則吾將手刃之公矢志皎然如
此而撫史謂公見蔡公遺奏激其忠義以死其稱蔡公
則誠忠矣如公何余謂死生之際豈易言哉使公果不

欲死楊士奇不嘗為周是修立傳乎卽如樵史言公亦
毅然大丈夫也而况平昔志行赫赫在人耳目子何庸
為公憾邪方公叅軍太原時吾縣中科目視他郡邑為
盛徃徃受主眷據要津如公武進曾莫知其為慈谿人
也風霜搖落潦盡潭清公獨與劉先生而強者屹然如
二華挿天遂足為數十年米鄉邦節義之倡余固覩場
屋詩文之不足以得豪傑也

論曰明室之亡也太平由於文武之不和書生懦不知
兵一朝居人上好操文法從事武人類起粗暴昧禮義
臨危輒驕蹇不受節制而國事不可為矣如公與蔡公

又何其同心而并力也使風霾不作雄賊無從中變太原城得稍延旬月為神京屏蔽天下事不可知明皇安知無韋蜀之行甫宗安知無靈武之役我公即與常山睢陽同禍意九原亦瞑目也乃不幸而使千載之下徒與李庭芝姜才守揚事同一浩歎豈天命固有在耶悲夫

鄧歐石三布衣傳

汪有典

汪有典曰嗚呼當甲申三月十九日之變士大夫相率迎賊旋轉取富貴開門者樞臣也勸進者宰輔也投名受職者百司也凶問至於南都立私人報私仇者逆黨

也咸置先帝不問矣而市井耕氓悼喪其君恥不戴天者獨所在不乏也予以所聞鄧歐石三公者分固不必死也然竟死噫烏得不傳

鄧公諱竒遇字會明相鄉人農家子也不知書聞國變奮袂欲殺賊苦無助謂其妻曰吾欲死義爾能從乎妻曰夫子將蹈高節妾請先之卽仰藥死次日塵之祖塋之側台親故與訣衆曰子草莽賤士而損軀徇國好名不已甚乎悵然曰嗟乎是何言士固有志豈以死博名高哉竟仰藥死

歐石二公者皆武進市人歐公諱敬竹有妻與鄧公同

亦不知書石公諱士鳳無妻有僕僕亦無妻畧識字家
俱貧無生產歐公為人修破扇糊口得錢卽飲酒市中
醉輒為人言嗤薄一世人世人皆笑之聞烈帝褒貽鄰
人與飲曰行與若訣若盡我一卮酒其妻提壺來睨之
笑曰子休矣聞舊官皆作新官又安在子歐公曰姬何
知此而翁所以欲死也竟闔戶自經妻未從

石公旣貧無妻與一僕相依而不屑營生計聞歐公死
歎曰我不可以後之剪紙為位大書曰明布衣石士鳳
之位納之忠義祠文信國諸公位次下市脯酒祭其先
邀隣人與痛飲竟日迨夜出戶赴忠義祠池中死比曉

其僕踉蹌出涕哭於市曰吾主人死矣覓其尸不得至
池旁見雙履乃得尸先歿日石公以三金予其隣鬻棺
者曰世亂吾無用此姑寄汝家既死遂取棺以殮其僕
未死然終身不娶同時有武氏僕者事武愔率匡以義
愔受賊偽職索吉服迎則僕大慟曰奴聞主憂臣辱主
辱臣死今上已崩此何等時不奔喪哭臨反取吉服事
賊乎叩頭出血愔不聽叱之去僕曰主為名利惑不聽
吾言後必悔李賊貪滔無道上干天怒下拂民情不久
必敗吾不忍見主人之失身且罹禍也遂絕粒死愔官
偽淮揚防禦使淮撫路公振飛擒解南斬於市嗚呼衣

冠為盜賊丈夫為妾婦詩書文字為桮棊滔滔皆是僅
一武慤哉固亦不足責爾獨恠武慤之教不能行於其
僕且為所料也噫是為附傳

邵郡丞傳

汪有典

公諱宗元字景康潯又芝碣山人崇正末由貢生官保
定府同知署府事甲申春李自成圍保定新太守何公
復始至以印讓公曰吾已誓死而入勿以臨敵易主搯
衆心也遂與故光祿少卿張公羅彥等糾鄉兵二十人
登陴固守當是時督師李建泰抵保定與賊遇陰有異
志矣而公等皆未之知賊陷京師遣偽將劉芳亮射書

城上諭降建泰得之召衆傳觀其書曰國亡矣復為誰
守公勃然曰吾輩受國恩宜以死報安能覩顏向徇豕
求活邪建泰趣何公印迎降何公曰太守未嘗有印也
卽有必不為此用問公公顧視其肘涕泣被面大呼曰
曩知府米不受印宗元所以不固讓者以守城之議倡
自宗元也此時卽知府爭印亦不與况閣部將劫取之
以授賊乎因目建泰數之曰嗟乎宗元一江北老貢生
耳位不過郡丞碌碌無足比數然猶不忍背主苟活閣
部固名甲科受任將相縱不自愛惜獨不記出師時皇
帝親祖正陽門以武侯晉公相期待邪顧喪心若此建

秦瞠目無以對獨夜縋其私人出陰與賊約降明日城陷公挈印投城下為羣賊所執搜得其欲奪之公大罵固不與遂為賊所殺猶手持印不解賊斷兩指取以去何公立礮前自轟死張光祿兄弟婦女數十亦皆死而建秦竟卒其麾下降賊矣

汪有典曰嗚呼明李仕官獨尊進士禍亦莫烈於進士士由鄉貢起家卽自樹立無有推轂至公卿無論公卿亦少有至牧守二千石者進士則進捷而退難聲譽易起絀誤易復失職敗節可歸罪為功其力至於顛倒一世之刑賞是非而不以為難以故進士之黨益固勢益

橫不八其黨則排斥禁錮誅殛流竄不遺餘力正人既
去益靡顧忌易心蒙面宗社可覆君父可忌而進士之
好官必不可失人謂明祚亡於奄亡於賊而不知寶數
千百輩庸惡陋劣之進士並心一力居奇貨而趣之也
公之老貢生與李建泰名甲科賢不肖相去何如一印
尚惜肯以天下予賊乎進士之徧重流桎若此可勝歎
哉然如何公卒亦何嘗非進士也何公蓋以崇正甲戌
及第山東萊州人字見云云

明季野聞卷之二

吳副榜傳

汪有典

公諱應箕字次尾號樓山貴池人崇正壬午副榜乙酉王師下金陵謀起兵被執不屈死如皋冒襄為之序曰嗟乎余讀樓山先生遺詩及子班北歸手奉史傳歎啟正之際文章朋友何其鴻昌俊偉極一時金石膠漆之剛堅又致歎四海一堂同拜合志相與憂憤激烈慷慨悲傷以至於殺身成仁不待傳檄無煩號召如虎符合也嗟乎海岳精靈文章星鳳不必待時而駕咸值昌時一代醞釀三百年培養氣運雖盡而黼黻日月之光無總英雄之畧者受命

挺生雷策電驅金戈鐵馬畢命遂志以身殉君國不辭
膏斧甘心斬絕此唐宋以來所無而吾黨學問氣節數十
年輪囷離奇鬱蒸所致不可誣也猶憶當年拜氣千里命
駕風雨不渝晤對雖不以時不以地然三年應制會獵舊
京十五國人物畢集南雍之盛踰於北而諸生以禮相見
或珠盤玉勒推執牛耳會者咸千百人或某月某日甲與
乙刑牲而盟告之天地父母倚蓋終身砥礪期許大江以
上為吳樓山劉伯宗城貴池大江以下為楊維斗廷樞吳縣天
如溥太倉而維揚上下之間絡繹八省郵合吳楚則余與鄭
超宗元勳揚州梁湛至于涑揚州以影園為都會樓山之為人卓犖

淹通豪俊負大志一貧諸生揮金帛娛拜色好面折人過

與公卿大夫辨論是非得失赴人患難緩急如不及至於

經史證擬國家關係時勢安危方輿形勝以及兵賊戰守

攻擊之成敗無不抵掌而談掀髯長嘯唾罵痛哭而後已

予與樓山交在癸酉夏一見莫逆時先大夫課余考功署

下第遂別至丙子館樓山而受業則今吏部許琴公焉同

余與劉伯宗沈眉生壽民陳則梁梁海張公亮明呂霖

生北龍劉魚仲履丁張芑山自烈顧子方果無侯雍瞻岐

方密之以智孫克咸臨桐沈崑銅士杜陳百史名夏麻

孟璇三衡梅惠連之煥萬年壽祺劉湘客相陝周勒卣

汪縣

麻城

徐州

西

立勲

李舒章

華亭 豐華

顧偉南

開雍 華亭

徐闇公

字遠 華亭

宋子建

存標 華亭

陸子元

廣曾 華亭

諸君數為大會姚伯若

與 華亭

國門廣業其一

也雲間夏彞仲

允彞 華亭

年伯李存吾

待問 華亭

陳卧子

子龍 華亭

以公

車不至乙亥留都防亂公揭出倡之者樓山子方陳定生

貞慧 宜興

而一百四十餘人誓驅逆黨逆黨者懷寧也

阮大 鉞

魏

忠節公

大中 嘉善

死懷寧手忠節仲子魏子一

學 瀛

刺血上書請

歛始定城朝丙子一以蔭入南雍懷寧欲甘心焉余大

開桃葉寓館挾子一大會死事同難諸孤兒為左子正

國棟

桐城

子直

國林 桐城

子忠

國 桐城

子厚

國 桐城

繆米室

江陰

周子潔

茂 藻子

佩

茂蘭 吳縣

周長生

吳縣

顧玉書

猗生 常熟

高永清

無錫

黃太冲

宗義 寧波

李

膚公

遜之江陰

同子一共十三人陳則梁兄長歌末句有只恨

楊家少一人以應山

謂楊公建

公子不至為恨觀者如堵子一

出血書疏稿及孝經共展詩畫淋漓齊拜痛罵懷寧意阻

樓山大快蓋重余為防亂驅迸後勁又與諸君佐吾師吳

橋范大司馬

景文

送茅止生

元儀湖州

父子勤王時芑山僑寓生

子貧甚共醵金會湯餅至數百金芑山峻謝答責持金以

入僕人當時友生成集勵經濟修名節嚴取與如此豈復

以區々功名勢利為念哉閱歲丁丑過梁溪陽羨余與樓

山子方定生重定心交樓山子方合刻唱和詩已卯夏雪

苑侯朝宗

方域歸德

來南雍朝宗甫踰二十雄才灝氣挾万金

結客首與樓山定生勒卣芭山密之梅朗三

郎中宣城

惠連姜

如頌

坡萊陽

錢開少

邦芭鎮江

及余相見執贄殊隆定生携髮覆

眉之才子陳其年

維崧宜興

來負笈樓山門下維時杯酒論交

江山生色父子師友松栢芝蘭而公亮兄捷丁丑令揭陽

伯宗魚仲以薦舉出守眉生疏論武陵不報還里咸不至

一日樓山責余不援同郡湯薦元

廷璉宜應

之難余既未與湯

相見又不敢忤父執賢者適袁臨侯

繼咸宜春

先生出獄特擢

兵憲揚州樓山相過數言袁公語學使者免褫革送八閩

樓山之為友又如此時年伯周仲馭

鎮金壇

以喪服來南謝

當事樓山諸君左右之一日於高座寺叔門生五百餘人

余在座有所商不合去棲山不以為忤也是科密之舊朝

宗提第三下第辛巳半歲先君由粵調衡永又調甫破之

襄陽監寧南軍左良玉余往返萬里卒得救先君於二百萬

殲賊三十萬騎兵中皆同志力是時密之聯第尊先生孔方

以楚撫逮下獄陳子育名未詳撫偏沅護荆

藩困賊中與余同予苦辛密之子育兩不得當也壬午

夏秋余從方孩未先生震孺壽洲楊機部廷隣臨江錢殷求朝彥浙江魚

仲陳皇士齊士長洲孟長人應春仁和和洗心詩送黃石齋先生道周

戊五溪同魚仲蔡懷直忠金拮据行李送吾師范大司

馬應詔入京時棲山罵石齋先生閤人於淨海寺於司馬

多所條對又同樓山子一李子建

標嘉興

看懷寧燕子箋於

魚仲河房復大罵懷寧竟夜側目樓山者多所不可惟余
知樓山五岳在胸觸目駭心事與境忤潦倒拂逆或奮袖
激仰忽戟髯大嘯卧隣女傍撾鼓罵座皆三年後死事張
本也是科惟子一售余已八穀與樓山雍瞻舒章宋轅文

徽興
華序

夏仲文

四敷
金陵

吳王隨

國對
全叔

宗鶴問

觀上
元

百餘人同置

副榜京兆金楚畹先生謂副榜之盛百年所無千秋致慨
特刻題名叙齒二錄詎知南國賢書竟以是終哉此後賊
勢孔亟中原板蕩同志鳥獸散矣甲申崩拆南都建立吾
邑割地隸興平

興平伯
高傑

又民亂百口無所托秋冬走南都

時懷寧翻案驟用放手殺吾黨修報復予靜卧一所河房

聽之樓山定生以救仲馭南來定生下獄樓山跳而兌校

尉屢及余門不縛或曰劉誠意力孔昭余不辭也以小草與

載敬夫重和州仲文孟蘭芷蒲洲兄弟錢魚宥無錫程權伯正翼

朱叟士金陵張拙生姜吳縣魯孺發一藻和州同奉特用敬夫毅然

請危疆余時以獨子侍兩親西辭閣部史公可法疏薦救災

監軍歸奉親走監官依則梁兄轉徙至張鰲浮離赤海鹽大白

居卒遇大兵殺掠男女二十口予驚憂病百日死一永夜

復生還里則本朝第一巡方使者姜公金名萊陽徵書特薦已

三到門按臨泰州予時奉親寄寓宮紫元家偉錫秦州况紫元

與櫟園兵憲

亮工

親來勸駕余扶病告籲至再後姜鐫級始

兌時在乙酉深冬則傳聞棲山以義盡節死江上子方父

子死梁溪敬夫從戰茗雪裡創歸死和州湛至死萬安孟

璇死涇縣克咸死海上仲文全家死西粵大平蘭芷兄弟

死豫章雍瞻兄弟叔侄死嘉定卧子彛仲文子死華亭機

部黎羨周

遂球南海

死虔羨周者庚辰同百史巢友與予分咏

黃牡丹至十律為虞山所特賞以未與棲山同前會故前

不書徐巢友

穎海

薦元兩布衣髡鉗一以督撫死閩一以

督撫死粵棲山當日相救不愧也甲申超宗先以楊州城

守死亂民子一賦絕命明志死北都後維斗崑銅趙我完

自明
新朱昭明 錫
太 倉

諸君無不死眉生密之惠連年少如須闍公

拙生咸太半棄妻子散家產去鄉里以僧死於名山四方
湘客至粵稱殿上虎予杖遣戍死孺發為大司馬歸死開
少為大中丞僧死南岳嗟乎烈皇帝殉社稷自閣學以下
殉主者僅二十一人議者謂建文之亂與魏璫殺戮忠義
種子殆盡何以奮義竭忠死者如微之表甄逢父與昌黎
書云天下大亂死忠不必顯從亂者不必誅而眷々本朝
甘心白刃難矣哉若甄生弁冕不加於身祿食不進其口
直布衣一男子耳延頸受刃分死不辭在古與今百不得
一今吾黨皆太學諸生所謂弁冕不加祿食不進死者僧

者數十百人視微之所褒百不得一何啻霄壤又議者謂
崇正間處士橫議擅操國柄要挾公卿皆漢亡國事試想
甕牖繩樞乾滄朽蠹與朝廷似有間乃一聞國變同毀棄
身家上滅宗祀下殺妻子斷頭碎骨浩然不顧以報二祖
列宗教養自非讀書明道窮理養氣群居確然坳砥礪
安能以天下已任綱常名教共肩一至如此小東林樓山
首倡之其制義詩歌古文辭高古不必論讀其廿一史之
論與東林本末兩朝剝復庚辛壬癸記讀書種子諸書其
刺促寒總塵埋八股時根究治亂尚論千古至蒿目時艱
於國家陰陽順逆政事人才無不臆記手抄存之夾帙其

功在國家吾黨直與日月忠義同不朽矣冒襄之序如此
方大鍼之必欲殺公也公語侯方域曰今有欲吾謝大鍼
可轉禍為福者豈不為范滂所笑我會左良玉稱兵拜言
清君側而大兵已逼獄乃解公歸起義戰敗被執就刑語
刑者曰吾死無去吾冠將以見先朝於地下也談笑而死
授命處血迹至今猶存洗之不去

汪有典曰嗚呼公羅九經二十一史於膏中洞悉古今興
亡順逆之迹當神宗時天下太平無事而公多憂危之言
人皆竊笑之迨其後天狼墮鼠禍機將發大臣將相又皆
畏罪持祿不為補救甚且不惜以身為餌公則張目奮袂

而言之禍福利害不為少動人又竊而笑之群犬吠怪理固然乎同時諸名士之杜集者亦不盡皆君子而死生不相背負飛繁相泣鬼神者正自不少也余次公傳錄冒氏之文以附見焉誠不忍其沒々已也

張侍郎傳

杜濬

張侍郎名伯鯨字瀚伯江都人生而敏穎自為童子受書即務求大指為人克勤孝悌務合先聖法言屬文華宗並茂澤於經術其學以循理治氣為主嘗曰天下至不齊者境而吾以理持之即安往不得其正何事足動吾心暴吾氣乎真得孟氏之傳矣中萬曆壬子鄉試丙辰登進士第

除會稽知縣改知歸安縣察廉不阿邑紳有居政府者弗
謂便也徙知鄞之故句章地公力變積習扶植鰥寡挫抑
豪強繇是拜名流聞浙東西無與比然遂有痛啣之者乙
丑朝觀計群吏公治最高筭擬擢吏部司屬而向之啣公
者為柢格銓地持之當是時大璫弄柄天憲王爵由其喜
怒冢宰修人才禮惟謹勸凡考選吏部給事中御史非出
其門不可得稍倔強者或罹奇禍復值楊左繆李諸君子
封事劾璫赫然陳屍璫益因以立威震讐群靡莫不凶々
病悖或以啗公曰君曷從乎由此則銓司由彼則北司矣
公為若不聞也者然以潔廉無可捃撫止調簡知河南盧

縣當三藩之國臺檄所屬有司于分派地界治帳殿供具
隣邑騷然民不堪命公獨逆謂親王駕半警趕水陸皆有
坦途此瘠邑崎嶇万山中從官導引奈何出此徒勞民無
謂獨不治邸吏危之曰脫至奈何公曰令在此無憂也已
而果不至一境獨安咸以公為神公笑曰何神乎吾以理
斷之耳以外艱故崇正二年朕閱先是公以不附璫朝夕
慮不測死無所名至是先帝英斷磔璫如腐鼠門生義兒
輩畧盡公喜展布有地慨然以廓清內外為已任誓一功
不避險難故從此事先帝十七年始終兵餉勞瘁不可名
狀卒以死報國無所憾非慢然矣八為戶部主事管理章

奏尋理延寧英儲人謂章奏煩局遽儲危任連授一人非
部差故例公可以有辭公毅然曰是何言也人臣不急公
久矣咸執故例為趨避是市易之道非所以自靖也延寧
流寇所自起而與捕為隣兵所以不盡死力者良由餽餼
無蓄何韓滉其人耳某雖不才方將請以自效又可以故
例辭乎聞者壯其言急裝趨榆關單騎按行驗其瘠弱蓋
此鎮自黃甫川西至寧夏一千五百餘里吉囊等部落住
牧圉近區脫無幾而其地不產吾穀芻糧皆仰給腹裡鹵
掠漁河則餉道回遠年來中外多故蕭然煩費軍儲不供
自賀蘭山沿黃河至漢唐二集歷花馬池向所稱險固沃

饒精兵勁卒處今皆髑髏相枕殘黎僅可指數空城遠戍
一望悲風朔雪寒心銷骨而已公攬轡熟籌以謂此地民
無起色即兵何由飽於是累疏極言延綏危苦狀時先帝
方厘西顧前後俱報可公乃多方通商越窮徼醜地往返
甘涼間潛運米豆課民蒔蔬以資糧之又倣朝宗邇商中
鹽遺意立官賣法以充發射軍民兩便頓異昔觀公雖專
主餉而嫻於兵畧恥為避事俗態流寇不沾泥乘旱寇石
蜜將攻鎮城公趨幕府為畫策立擒之天子知公能陞榆
林中路按察司僉事屬意且大用矣公即請兵戰賊點燈
子王左挂於萬佛巖馘之又勦金翅鵬一座城於延水關

親歷行陣斬首萬計押漢兒賢王古路亦就戎索款塞內
附其庸武焯爍著西北邊髣髴涼州三明云崇正六年晉
巡撫陝西都察院右僉都御史公禎策我新任而舊撫出
師將領奔命揮首必將乘虛入犯密戒諸將無得離汛入
賀暗授方略設伏以待是日方受節捷至斬首三百二十
級獲馬匹刀弓稱是揮罕寇獲山擊之斬首百二十級由
是懾伏終公任不敢動論魚河堡功加俸一級予封三代
如其官廕一子當是時公氣吞九塞謂五原克捷朝廷威
嚴即內寇自靖其本謀也值內計用小役請恩澤不得造
蜚語御史倪成章以奏公辭不離有旨諭留公力請罷乃

聽解任公還里搆灌木山莊雖時弄危酒覽書林而目擊
時事樞本標末曰益竅聖天子孤立無公忠憂國之臣偽
君子真小人相與釀成魚爛將遂不可措手嘗蘊憤意不
樂或中夜起遶床彷徨歎息拜達寢外崇正十一年天子
憂賊共鬲一舉撲滅大治餉思公延寧成效於是詔論公
殯山切起家拜戶部右侍郎督理楚餉辦勦賊張猷忠於
襄陽督師閣臣楊嗣昌鎮帥左良玉軍食一於部給合計
餉額歲三百八十萬而嗣昌為人苛饒迂曲細已甚又復
自用不能諮公畫良玉病不能用衆多収群盜亡命擄掠
劇于賊怯戰養寇糜餉不可計顧反謂餉縮公為披籍乃

更羨良玉慙曰吾不可見張侍郎然獨心伺公及公拒協濟千金乃齧舌崇正十六年入為本部左侍郎部尚書為慈谿馮公元飇元飇故長者第苟見上前用嘉靖中丁汝夔故事斬兵部尚書陳新甲西市恐懼不敢任事無何移病公掌部事獨不為前却釐舉措置一秉公正應機宜上褒嘉之會冬召對萬歲山步行觸寒足病大作伏謁不能起上目中官掖張侍郎起退而患益劇公念此時軍書旁午人臣非任即去寧可在官養疾廢公家務乎遂乞骸骨章七上乃得旨以原官致仕行至山東聞國變公附膺大慟曰使臣不得從皇上者疾為之祟也昔臧洪田疇以一

介事辟命之主猶誓死必報况臣天子大臣有不梟誅逆
賊者目何以瞑歸里晝夜泣隨聞南都文武方議迎立公
喜討賊有主將赴行在表出師而形勢一變群小肆於建
業其渠魁大慙至仇視先帝言義旗北向者禍不旋踵而
且盡撤江北之旅為虜楚皖之弓公聞之抵几曰事無可
為矣徒令先皇帝恠我久遲不死耳我必死我必死嗚呼
是猶崇正十七年也明年淮耗至公曰是吾死所也邑人
紛々避去公不動親知番說公不應城陷兵衆至公冠服
端坐揚々自稱張侍郎今日明白死兵衆半南人或金曰
好箇大模樣蚩子都愛官爾獨愛死耶公荅云々兵衆復

為好言云々公怒甚而笑忽突前奪其佩刀自刎死兵衆相顧失色曰是好男子時年六十一公之將授命以語其夫人韓氏夫人曰君能死國吾獨不能死夫乎先自縊死子婦郝氏繼姑投井死公一子雅度以父任旬日詣行都謁選且受公旨聊觀諸君所為故獨不得死每用嗚咽然是殆天留以遺公也公狀貌端勁辭氣安雅平生與人臨下務克己多恩惠見義必為然不可干以非理故邑子部民莫不愛敬之方理延儲時都御史張福臻者以過覈失士心一朝出教椽曹聞軍多冒食吾且按簿批根用祛宿弊於是一軍悉甲將為變獨抽刃相戒曰毋犯部司張部

司如爺孃公急趨都堂撫慰衆遂輯一時傳軍中語宛與僕射父兄之句相為配儼其以德懷人類如此乃其臨大節則秋霜燬缺方其潔勁時謂公循理各當真能行其所學者公有文集若干卷奏疏尤長曰遭兵燹皆不存故失載雅度以為恨雅度字介子有文藝厲志節不辱其父

杜濬曰濬至廣陵則主因圃因圃者侍郎讀書處即卒其夫人子婦同日死節處也為之徘徊壯跂而不敢以興哀慮取笑於魂魄也又問所謂灌木山莊者則公疇昔既弛為河用免發民間塚嗚呼德厚哉濬次公事以向所疏記反覆叅考頗得其案因竊歎公始終兵餉為國勞身功名

盛於西夏雖范文正何以遠過即使其百六勿逢委衾牖
下亦合於傳之以勞定國者雖䟽後昆可也而沉重以常
山若水之夷列乎夫忠孝性植而名父嘗無肖子父蹈白
刃而子趨圭竇向歆之恨徃々而然而侍即有子獨能刻
痛於心世守一節天之報施於是乎異

此良遷董兼麗卿雲

陳其年

歲丙申公之子介子交余已十年朝夕爾汝可謂忘形
矣及朞此傳必先期齋沐肅拜盡禮召賓客歌舞為壽
極驩然後以情告余之好友前民爾阜當時俱在座不
可誣也蓋重其父祖以及文章前輩皆如此不獨介子

然矣今人待文成而後量酬乃近交易之道殊為不古
記之以告後五百年文人之有道者知自重焉 此傳
介子求詳故余不敢畧然班傳皆詳凡不詳者不得其
詳也着意畧者元非是 自記

賈鞠毛公傳

儲大文

武進賈鞠毛公名恢恭字端甫高祖憲仕至刑科給事中
以理學顯父應曾公少而卓犖七歲喪母哀毀羸瘠年十
八始受書半載日成制藝三塾師駭曰吾不足為爾師乃
師張清惠公數年清惠公從容語曰子不當在吾弟子列
盍從吾師遊乃復師孫文介公公以崇正庚午舉於鄉

庚辰成進士授寧德知縣改候官福王立授陝西道監察御史晉一堦唐王立提督福建學政順治丙戌八月大軍入閩丁亥七月十一日公死之先是癸未春京師戒嚴巡撫張公肯堂舉兵勤王衆不盈萬公募二千人隸以往師還得溫綸張公進貳樞部公行取未代而張獻忠別將陷索吉且攻贛以窺閩張公憂甚公議曰江閩喉要在杉關閩若破則全閩震動今且厚集兵勢以守閩之固賊必不能越邵武而南也會城內地兵民可互用守禦之事職請任之於是區畫軍興比隊伍夜宿筍輿中凡兩月獻忠趨蜀兵少解而李自成陷畿右詔勤王公以邵武兵難遽

撤復與張公建勳召義勇甫及境度聞公既悼國難結聞
陪京政亂居常鬱々念天下事必不可為且畏鄭氏逼與
張公相對泣下戒守閤勿出而召命亦不及以此淹久於
南不復歸及閩嶠之降附也公適試士訖由興化至洪塘
聞之痛哭躍入水救而止乃轉側泉州建寧間亡何土寇
破建公力疾適崇安舟至萬石灘女夫劉元趙錡斯前行
會大軍南下不屈死公神色怡然顧夫人周曰而曹宜死
夫人遽抱幼子躍水死二女亦死公行躍而兩卒突入舟
持之併二子置沙上公數大呼曰速殺我時土寇勢張甚
帥誘公却之公厲聲曰若亦知毛提學乎尚奚道帥遣兩

卒持刀下欲犯而止者三公麾下二子間道走而手招兩
卒曰速殺我速殺我乃被殺投湍水中時年四十有七翼
日二子上下灘求之不獲建人士聞者皆雪涕焉公學主
敬靜著擇言藁澹齋藁今藏於家其知寧德縣也除庫役
里長之害高貲戶以安禁令畫一盜萌芽不得發上官以
為能攝候官兼攝羅原事胥辦其改候官也治知寧德其
提督學政也南北諸貴人駢集札亡慮日數十公平不啓
至解印綬上之乃止鄭氏嘗薦童子十公對使列書芝龍
大怒公由洪塘趨海將赴永明王於廣凡八晝夜不克達
復之泉亦坐鄭氏云公死時僕鄒良王大郎皆死僕王秀

妻亦抱幼子躍水偕夫人死王秀者公嘗命輅二十人以衛京師者也

讀曰明亡諸臣軼事如史叅贊王協理輩傳記多舛異公實死於節而明李遺聞書憂憤卒此吳越人傳聞之詞非其案也予考諸建士大夫又得公子溫錫行畧爰著於篇公雅善黃少詹馬洗馬吳儀部洗馬死於燕少詹死於金陵儀部後死於廣而公不克達天也然流躋嶠南卒以家殉嗚呼烈哉

慈谿沈氏二忠傳

儲大文

丙戌夏王師濟淞江明魯王奔台州八海六月二十四日

知甌寧縣沈履祥死之庚寅破舟山城明行人沈宸荃以
魯王奔閩粵壬辰春正月二日颶風作死之寧波之慈谿
族望沈師橋履祥系宸荃從兄天啓丁卯舉於鄉崇禎丁
丑進士而宸荃鄉舉已卯成庚辰進士官行人壬午同考
順天試得劉敷仁譚貞良梁清遠姜畱南旋遣祭部臣蔡
思充於漳浦喜語人曰少詹事黃公邑人也吾今得師矣
甲申歲使事而三月十九日變聞福王署山西道監察御
史巡視中城疏言歸汝青海死守紳士々民團結塞堡宜
差授官以收拾河北又言當今大勢宜居重江陵如陸遜
之拒漢以遏川蜀九封潼武戍守大河西如東魏之拒西

魏北如宋之拒遼以為第一重藩籬其次自襄樊鄆黃東
徹宿楚如南宋之守淮東西以為第二重門戶而江楚運
軍江北之上班軍胥宜練以實伍又今歲入銀六百餘萬
兩淮徐四鎮樞督帥餉業二百四十萬楚一藩四鎮二督
二撫三鎮團營操江守陵浦口京口費復不減淮徐國初
下金陵康茂才充營田使今宜酌私屯政又箴王間閔河
北備嘗艱苦願無忘蕪羹麥飯至叙功濫而將領胥橫金
曳王監紀多而破甑胥崇階顯秩請乞贈廕盛而羽林胄
監無駐足地願割恩裁靳又請趣黃道周泣禮部尚書正
詹事任而并薦詞臣徐汧吳偉業吳太冲劉同升葛世振

沈廷嘉又以歲久旱覈陳五行疫沴之應中言今有好作
威福多指欺炫謀回適營心貪黷者胥不合天心最後乃
直劾署太學士馬士英盡罔誤國狀福王怒議辟之給事
中御史交章救乙酉轉蘓松兵備道而五月二日疫旋聞
亟詣越魯王署兵部左侍郎兼副都御史令偕諸將畫江
守轄瀝海所隍三江黃家堰間御軍整廛開亡錙豪擾瓜
瀝人德之北瀕江戍潰亟南見王慟曰事迫矣昔高宗由
大狹口出海仍引而南展轉牡蠣灘金鰲間請循剡山詣
海門庶天獲悔禍復協金鰲吉識乃定趨台而是時履祥
亦以太僕寺少卿轉台餉同走海門宸奎與兵部尚書張

國維護王航定海中左所而履祥執於李氏遂不屈先是履祥銓知候官縣復知甌寧胥有惠政福王時咨行取吏部魯王署監察御史晉太僕嚙叱走海門或曰盍避乎履祥泣曰死吾分也且按冊索捕吾父若何乃賦六詩以訣而揮女弟夫童某之鄣偕死者曰亟去若奚庸爾遂就執帥議還職徃撫閩謝曰文信國有言吾不能捍父母而反教人叛父母乎然則且薙髮曰頭可斷髮不可薙也引頸就刃旁睨者胥掩涕當是時建福絀潰道周殉故都宸荃設位翁山螺峰間令履祥哭酌之而日偕國維暨邑壬午舉人張煌言練舟山水師修慕干戶成許指揮友所等

城新譚尚書綸增築敵樓列巨舶東南水門外又聯絡王
環金塘沈家門以儲穀結鄞固犄角勢者東閣太學士兼
兵部尚書凡抗守六年而破國維赴水死宸荃護王航閩
之風櫃南日山粵之屯席頭炭崖寨五門之由龍州泗城
走黔時永明王衆已潰且竄宸牢朱波鬱咽復走海望浪
白外洋歎曰此吾一丘乾淨土也遂以舶殉嗚呼明之亡
忠烈士衆矣即如崇正丁丑庚寅榜浙東西進士凡九十
人錢太倉肅樂陸行人培吳長安從義金臨清堡孫職方
嘉績胥用節顯獨履祥偕庚辰特奏名應安定昌士奮髯
殊胆死國尤烈且度越諸公而埒邑先正劉鄢陵振之宸

荃班行後進士遂克撐闢硎洲崖山於距威遠五百六十
餘里之近洋以對峙張兵部此其胥紬火磨而死也兵部
類陸丞相宸荃類張樞密雅偕信國號大忠而宸荃并合
君社稷而胥重之嗚呼使天無遽用殄絕颶不作舟不壞
吾又未知陸貞臘大古喇之洲魯門島其經畫且奚似也
昔宋二王海外事以鄧光薦亡故元至正修史多漏畧正
統時張毅齋亦句章人殉土木難後百餘年至晉江道思
王氏始表之今宸荃書明史草而蹟歟詳覈履祥并不書
省志然則當世之為晉江王氏者庸得不慙有以光闡之
乎當履祥殉台時兄毅祥往求齒不獲越二月間止逆旅

市飲者遽詔淨曰督餉官直忠臣亟覈之具獲就刃狀暨尸面如生蓋猶賫啼隣哀鳳悲吟激嘯之志云甫宸荃工文䟽議法宋葉文定公家藏草十六篇蓋蹈海後八年而煌言亦引決於江皖之間訖以波臣殉

黃戶部傳

汪有典

公諱周星字九煙上元人育於楚湘周氏崇正庚辰成進士除戶部主事䟽請姓亂後變姓名曰黃人字畧似蹄本非又蹄圃菴又曰汰沃主人又曰笑蒼道人布衣素冠寒暑不易生平正直忠厚好濟人利物而真率少文剛腸疾惡自饒一印文曰性剛骨傲腸熱心慈自詡與正人君子

鬼神仙佛相知而與小人多不合嘗賦詩云高山流水詩
千軸明月清風酒一舡借問阿誰堪作伴義人才子與神
仙又嘗作楚州酒人歌云酒人酒人爾從何處來我欲與
爾一飲三百杯寰區斗大不堪容我二人醉直須上叩閭
闔尋蓬萊我思酒人昔在青天上氣吐長虹光萬丈手援
北斗斟天漿天厨絡繹供奇釀兩輪化作琥珀光白榆歷
歷皆杯盞吸盡銀河烏鵲愁黃姑渴死悲清秋咄咄酒人
渾無賴乘風且訪昆侖丘綠娥深坐槐眉下萬桃花覆深
絳穆滿高歌劉徹吟一見酒人皆大詭獲成長跼進三觴
大嚼絳雪吞玄霜桃花如雨八駿叫春風浩浩心飛揚瑤

池雖樂淹嵒促阿母綺窓不勘宿願假青島探瀛洲列真
酣飲多如簇天下無不讀書之神仙亦無讀書不飲酒之
神仙神仙酒人化為一相逢一笑皆陶然陶然此醉堪千
古平原河朔安足數瑤羞瓊糜賤如糞蒼龍可饒麟可脯
興酣瞋目叫恠哉海波清淺不盈杯排雲忽復干帝座撞
鍾伐鼓夷如雷金莖玉液洗瀝渴披髮大笑還歸來是時
酒人獨身橫行四天下上天下地如龍馬百靈奔蹶海嶽
翻所向無不披靡者真宰上訴天帝驚冠釧廷議集公卿
今者酒人有罪々不赧不殺不可殺之反成酒人名急救
酒人令斷酒々人惶恐頓首奏陛下臣有醉死無醒生帝

顧丞陽笑扶酒人去風馳雨驟倉皇謫置楚州城酒人墮
地頗狡獪讀書學劍皆雄快白晝驚々三十時戲掇青紫
如拾芥生平一飲富春渚再飲鸚鵡胡手版腰章束縛苦
半醒半醉聊支吾誰知一朝乾坤忽反覆酒人發狂大叫
還痛哭胸中五岳自峩峩眼底九州何處々頭顱 改甕
生塵酒非酒芳人非人椎鑪破觥吾事畢那計金陵十斛
春還顧此時天醉地醉人亦醉丈夫獨醒定憔悴從來酒
國少頑民頌德補功等遊戲不如大詔天下酒徒牛飲驚
飲兼囚飲終日酩酊淋漓嬉怒々罵聊快意請與酒人搆
一凌雪燦日之高堂以堯舜為酒帝羲農為酒皇淳于為

酒伯仲尼為酒王陶潛李白坐兩廡糟粕餘子蹲其旁門
外醉鄉風拂々門內酒泉流湯々幙天席地不知黃虞與
晉魏裸裎科洗日飛觴一斗五斗至百斗延年益壽樂未
央請為爾更詔西施歌虞姬舞荆卿擊劍稱生過鼓王環
飛燕傳觥籌周史秦官奉罍與爾痛飲三萬六千觴下
視王侯將相皆糞土但石願酒人一世二世傳無窮今千秋
萬歲酒氏之子孫人々誦爾酒盤古酒人聞此耳熱復顏
酡我更仰天鳴々感慨多即今萬事不得意神仙富貴兩
蹉跎酒人酒人當奈何噫呼噫酒人酒人當奈何爾且楚
舞吾楚歌公感憤怨懟無聊不平則一寓之於詩喜食饍

底焦飯人呼為鍋巴老爹遂欣然受之賦詩云竈幸無郎
將號鍋巴猶得老爹名兒曹相笑非無謂慙愧西山有此
生學仙恨少休糧訣嚇鬼空多噉飯身如此老爹應餓煞
鍋巴敢望史雲塵隔江舡尾競琵琶金帳寧知雪水茶新
婦羹湯多得意老爹自合嚼鍋巴哺親焦記先賢苦節多
存感慨篇莫道鍋巴非韵事鍋巴或借老爹傳公靜卧一
室中每夜起攝衣冠肅客絮語不休質明或問故則曰吾
故人忠魂來相慰耳年七十忽感愴傷心仰天歎曰噫而
今不可以死乎自撰墓誌且為銘曰笑倉乎笑倉乎爾既
不屑生前之富貴獨不留死後之文章乎既不能飛身於

碧落不當演夢於黃梁乎而今竟若此安得不心傷乎然則甬之英風浩氣寧不翻五岳而配三光乎與妻孥訣取酒縱飲盡數斗大醉自沈於水時庚申五月五日也先是明亡之四年丁亥葉公尚高亦以五月五日自盡葉公字而立樂清人温州府學生兵後佯狂幅巾大袖行而市太守見而執之賦詩云北風袖大惹寒涼惱亂蘓州刺史腸何似蜉蝣易生死得全楚々好衣裳守釋之不問丁亥二月上丁携水一杯采芹一束乘太守未釋奠哭於孔子之庭曰吾師乎吾師乎縱泰山之已頽曾林放之不如乎守至怒繫之獄迨五月四日語獄卒曰詰朝屈大夫沈湘之

日吾其死夫俾具湯沐至明自經陳公緒新者仁和人晚
節納石懷中赴龍淵寺潭中死

汪有典曰嗚呼公之自撰墓誌也謂一生事々缺陷五倫
皆然自少至老未嘗一日安樂蓋生世不辰遂與貧賤相
終始然積功累行孳々為善非義所在一介不苟俯仰之
間毫無愧怍庶幾文人之有行者惟公能實踐其言公變
姓名有贈詩半非畧似君尚云此曹安得復為人嗚呼此
曹安得復為人

跋黃九煙戶部絕命詩

杜濬

佛氏戒嗔良為道眼不開瑣屑細故與夫 實理絀妄動

無明者言耳若夫事至鉅鉅名節所關人禽之界而亦復
不嗔則是形骸苟具而蕭然無氣古今無氣之人莫如馮
道留夢炎及平康里中阿家翁耳而可以為法乎吾與老
友故戶部黃九煙先生蓋深惡之而嗔益日甚至于無終
食之間違嗔以此取憎于世以致困窮危殆弗顧也然吾
之嗔僅托諸空言而九煙之嗔則見諸實事觀其無故沈
淵無病辭世非實事乎蓋積嗔有年而發揮于一朝世人
但見其猝然而不知其所以然宜其反指醒人為醉而不
自覺其如泥也可哀也矣今讀其絕命詩二章其首章固
已自明其嗔之故次章直欲與三閭大夫方駕齊驅豈欺

我我夫一部離騷經緣嗔而作也故屈子不嗔則無離騷
由是武侯不嗔則無出師表張睢陽不嗔則無軍城聞笛
之詩文々山以嗔故有衣帶銘正氣歌謝疊山以嗔故有
却聘書九烟猶是也蓋嗔者生氣故九烟不死不嗔無氣
故若輩不生世有我輩人不可以不辨此皆疇昔之日與
九烟互相砥礪之暨至是其令子備字禹公者過訪出二
詩再拜以為先人知己同調莫踰老僕請志數語遂書此
意歸之禹公負才有志能終身無改父之道乎則可謂孝
矣己丑陽月深懷山人黃岡杜濬題于金陵流寓之再造
草堂

西林公傳

汪有典

林公汝翥字大歲福清人萬曆間舉於鄉授沛縣令天啓二年以擊白蓮賊徐鴻儒緝妖人王寶光等功擢御史四年巡視京城民曹大妻與人奴忿爭不勝服毒死火者曹進傳國興平衆大掠奴主家擊傷其主刑官不敢問公捕得進之懼劾請受杖即杖之五十國興邀於道罵不已公收繫之亦請受杖復杖之魏忠賢大怒立傳旨廷杖公先是數日工部郎中万公憬以言事忤忠賢群閹毆殺之公懼死杖下逸去首輔葉向高者公舅氏也群璫疑公匿向高所則列兵圍向高第大索婦女無得免者當是時諸輔

臣韓爌何宗彥朱國祚史緡偕咸畏縮不敢言向高移居郊外遜位去蓋宰相之不足恃如此公於是詣順撫上聞卒杖之削籍歸崇正初起官右叅議分守溫處道不赴久之起瓊州道坐奸民煽亂貶秩旼福王時起雲南僉事已而解職魯王次長坦台為兵部右侍郎與吏部郎中林公塗攻福寧戰敗被執諭降不從繫之吞金屑死

林公塗字子野侯官人崇正癸未進士授海寧令甫一月而燕京陷南南所在度起邑鎮李刀三故大家奴乘間煽衆為亂通邑震恐公密遣人縛至對衆杖殺之其黨股栗從篋中出一紙曉於衢元凶既除餘悉不問衆驩呼釋兵

一邑安堵於是威名大著性淡泊無嗜欲厨傳蕭然不知肉食吏伺其乏啗以金公張兩手眎之若我十脂骨相從何處受金耶明年解綬敝唐王授以吏部郎未幾唐王去江西而魯王由海入閩公往從之告其父曰兒當死久矣守海寧當死扈從駐鐔州當死兒今不死失人臣之分貽父母之羞乃苴履負戈率先戰士死於陣

汪有典曰嗚呼自古未有變亂祖宗之制而其國不覆亡者也明太祖懲前代之失於內官特加厲禁法至善也至永樂則大變其制祖訓中人不得預外事永樂則有出使者矣有採辦者矣有東廠刺大小事情以聞者矣不令典

兵永樂則有鎮守者矣有詐傳詔旨擅役軍民者矣有奪
去叅政兵致王師覆沒者矣見公侯大臣叩首惟謹永樂
則有誣劾忠正鎮臣有異謀者矣有尚書繫內官監者矣
有總兵都督低眉俯首悉聽中官指使者矣有諛讚皇太
子詐傳上意注趙王致羽林變起幾危社稷者矣不許識
字預政與外官交結則有內書堂之設令太學士授內
使書矣馴致秉筆之閹秉機專政王爵天憲悉出其口生
殺予奪任已愛憎大權旁落宰相皆其私人矣詩曰不愆
不忘率由舊章易曰開國承家小人勿用又曰履霜堅冰
至可不戰々兢々哉永樂以其陰賊之性資徇兒諸閹之

力遂其篡奪之謀不能無猜忌於中外思以腹心叅之以
故於諸內侍寄筆札稱肺腑則雖祖訓鐵鑄視若弁髦始
之詔厲建文變亂官制者已亦旋蹈焉蓋逆惡無心肝如
此而在廷諸臣多建文舊人失節忠義專務容悅以固位
苟祿又親見袞々忠義屠戮之慘則益劫於積威之勢而
不敢援祖訓以強諍凡永樂所欲便其私畣者曲意以從
亦因寄耳目於內侍出漏天子之言於已入揚已之譽於
上於是大臣自輕而宦官重大臣自踐而宦官貴大臣自
媿合而宦官益肆縱至於天啓大臣則又庸惡陋劣仰鼻
息於宦官而莫必其命葉向高號稱賢相甘受宦官之侮

且去位以避其鋒而莫敢與之爭同時宰相韓爌等俱閉
口奪氣亦不敢牽臺諫助之攻溺晉庭者謂必無人為漁
陽操搗者大踴於尸冢之間豈不以此也乎張父趙母誰
憚不為竊太阿遷龜鼎直須時耳悲夫凶國害家禍始作
俑永樂之罪可擢髮數莖

草薦先生傳

林 璐

草薦先生不知其名字氏族始居豐樂橋南又徙而之鍊
冶巖經歲不出戶一夕偕客訪其居童子曰方卧薦上未
敢通日移晷徑披其帷闔其無人已而床上有拜聲歎覓
唾壺狀始盤旋下床立帳啓露薦語曰天寒甚客從何方

來先生裹氈情加以布帽、束帨望之頭上長二尺許坐語移時呼童子進酒衣厚如重鎧袖擁腫手不得卒把杯三人擁爐坐望其床薦高于几迫而視之計二十八簾夫床高五尺耳受薦二十八簾、以寸計高二尺八寸受卧止二尺餘扳而上如登山偃而下如墜谷勞矣無何先生醉又上薦卧案上詩文高與薦等與客竊而讀之似不從人間來客大笑曰昔司馬子長好遊故其文日益奇乃公跼蹐戶庭固以薦上得之者也先生居薦不得坐忽下床曰客惡知我言束髮以還冬月御夾衣客至常剉薦以飼馬客去徑上床卧又數好遊醉叩舷歌或墮水濕衣冰折

浙衣上不知寒而日與名公卿賢豪長者相把臂先生昔
遊雲間識彞仲夏先生及令子存古游越師事念臺劉先
生與李官大樽陳先生又識世培祔先生文學王懸趾先
生吳門則交葉君聖野雪苑則交侯君仲衡毘陵則憚君
遜菴豫章則王君軫石于浮屠氏乃與南屏豁公久游先
生又曰嗚呼自吾游至今三十餘年矣今其人皆以逝故
鄉好友自陸大行鯤庭殉國死諸君子三十年間或出或
處意趣各殊然南皮北海分曹賦詩歲々修禊事以為娛
樂迄於今有蟬蛻軒冕者有山林終者有自髡頂為僧者
有小草坐寒氊者有起以大慰蒼生者有墓木已拱久者

有糊口四方金盡裘敝者有憔悴且行吟者吾老矣猶得
卧薦上迫李烺輒益薦吾不意竟益至二十八簾也汝慎
無言吾又将卧于是里中人咸呼曰草薦先生云或曰先
生毛氏名先舒字稚黃古錢塘人

沈長公傳

林 璐

勝國末有沈君齊賢者字寤伊錢塘諸生也髫年讀書以
尺寸計執經問難師為屢詘既長慨然以濟時為已任然
性峭直語不合輒罵其同舍生生目之曰稱生君曰固也
君等便如曹蜍李志父病剗臂肉療之不起慟幾絕嘗送
賈棲水被盜故嘉禾汎弁也盜欲殺君會杭李官舟至

援以免嘉禾郡丞庇盜且為盜去間暮夜餽君金君不受
久之分巡浙西者曲為盜讎君移牒禘君儒衣君抗辯不
屈李官故持平者卒直君丞以譴去一時司刑者目君為
強項生時流寇充斥震及鳳陽竊園江浙騷動治兵者議
登陴君笑曰寇未至而勞民奚益流涕上書開府謂餉不
知措兵不知用地不知屯民不知恤東於具文畫界而保
以聽寇之躡躡可乎書入不省君感憤如家事常被酒入
神廟痛哭失聲同行者駭而避去越二年甲申思陵殉社
稷君隨鄉縉紳後笑臨三日不粒食者經旬復私立木主
於里社朝畢即伏地笑署其楹曰臣身誓死君讎必報社

故有雷神猙獰可畏君怒目叱曰汝亦當為國捍禦徒金睛赤髮驚里媼乎閭巷小兒環視而笑君起逐之一市人皆以為癡家人勸君飯進肉怒曰此豈食肉時耶更以惡草進家人問君若澁喉不能下咽者笑而去君不時悲啼客或阻君曰毋阻我笑之竟當自止會稽御史大夫劉公至君亟往謁扼腕論時事群淚俱下諸儒咸白冠環坐一生忽私語曰黃巢朱溫恐亦天命君直前奮拳毆之急逸去乃免一夕客假君舍會食客故以賢雄鄉里者君笑曰丈夫當散財為國家效尺寸吾視若曹圈豕耳拔壁上劍玩弄起舞劍光與燭光相射怒指四座吾當盡取若

首自刎其頭以酹若客驚惧匿几下或逃溷廁以免隣或
偶語恐君知相示以目先是前數年督師汪喬年發闔祖
墓之有燈檠火尚熒々不息尸骨腦後穴一赤蛇飛而走
迎日吞氣者三復八墓發而殲之君聞之喜曰滅寇必矣
及甲申難作君與人曰前言豈妄乎當再俟之已而南都
立君歎曰江左敬仲安在欲敲策闕下恥以口舌得官遂
遯跡皋亭山下乙酉闖八九宮山謁玄帝廟神擊之赴地
為村農所斃君不知也丁亥北來客過君道君躍起曰神
能報君讎乎吾少時期為張代州今來不及吳門許秀才
吾其死矣寢疾數日執弟之手曰吾孔孟一線尚在語不

他及葬有餘慟而沒

林璐曰予過君里中父老指揚清祠云此即君置木主處也猶咋舌姍笑曰此豈古所稱狂者也君壯歲本河畝大行而旁及兵法天文律呂著書三卷書成生子遂命名敬畝其意深矣

采薇子傳

附一壺先生

汪有典

汪有典曰吾宗人之居歛者由憲為余言國初績溪之嶺北有宿於路亭者拾枯枝撫野菜入沙罐煮食之鶉衣百結間入書館作字題詩不可解而字甚工自署曰采薇子問其姓名即泣而不荅每當三月國忌時僵卧數日不

飲不食不言笑人以是知其為故明之有官君子蓋績為
徽之僻壤嶺北又績之僻壤采薇子之隱此有八山惟恐
不深入林不恐不密之意乎其姓名既不可得則其科分
官位益不可得而捐妻子甘行遯其意極可哀余徃績之
嶺北偕友曹尚賢等尋其墓榛莽之中一孤墳耳再拜而
退此人既無姓名則不可以入史外之書然子費半生苦
搜羅勝國孤忠得香盈玉得玉盈車而畢竟香玉之沒於
泥沙者多有吾欲子之書於終篇梓此一傳以槩忠義之
士之不知名者以慰忠義之士之不知名者又即以為子
書之後序可乎余敬知其說備著之抑又有一壺先生者

不知其姓名亦不知何許人衣破衣帶角巾狎狂自放好
飲酒每行以酒一壺自隨故人稱之曰一壺先生知之者
飲以酒即留宿其家間一讀書歔歔流涕而罷往々不能
竟讀也先生蹤跡無定或宿野人家或居僧舍然不久輒
去々不知所之嘗往來登萊間與即墨黃生萊陽李生善
然先生對此兩生每瞪目無語輒曰行酒來余為汝痛飲
兩生度其胸中有不平之思而外自放于酒嘗從容叩之
不荅即舍之去康熙二十一年去即墨久矣忽又來居僧
舍容貌憔悴神氣惘恍每夜半即放聲笑々竟夜閱數日
竟自縊死垂七十矣李生云嗚呼余論次前明忠義諸公

本末淚涔々下蓋投筆而起者屢矣吁嗟乎又益以采薇
子一壺先生

朱長源傳

汪有典

朱永慶字長源以字行大興縣諸生父之馮撫宣府李自成攻之急軍民爭納款之馮獨行巡城指大礮呼衆發之三命無應者即自起燃火衆競執其手乃奪佩刀自頸死乙酉夏豫王下江南郡縣推長源起義兵敗執隸正黃旗甌宣府人姜納吾居長源修幹義髯倜儻負奇節性佷佛嘗搭七條戎衣人目為三教總持烏金玉聞而賢之賜以婦人輒辭不受掌科陽某死於難夫人華墮德姬隊王嘗

以賜人夫人薙髮以拒或以告長源長源頷之王既賢長源滋欲賜以婦遣八德姬院恣所擇長源既聞楊夫人墮是院也遂不辭見裏佛巾者知其楊夫人大言曰余大興故殉難廵撫朱之馮子也熟視而自引其眠若道裝余亦道裝大興達昆陵程易與耳昆陵者夫人故里也以此言微動之夫人知其非常人欲資以上掌科墓也亦不辭長源以夫人歸納吾家向夕夫人叩長源曰君脫難於厄宸難人否長源曰為全夫人節非特宸之而已是時納吾伏童奴數輩偵兩人而長源據椅誦佛燭且盡拜益高至曉拜不徹童奴報納吾納吾異之不言抵夜復令童奴以班

伺長源誦如初納吾又不言三夕伺之又復如初則納吾
晨興盥洗更衣候門啓抱長源足叩頭呼活佛徐曰吾既
不近夫人何贅疣此一受為長源曰此縉紳婦吾非欲妻
之欲完若璧以歸恐機洩不果吾願故且同室然非誦佛
無以明心不意為君偵得幸為我諱無敗機事也納吾曰
君誼動鬼神母復夕夕若君為治別室遣老姬侍楊夫人
曰奉兩人如佛矣久之聞於王王愈益賢長源召長源曰
公誠異人吾為合浮屠失趣長源令夫人具書達毘陵以
其母與弟來王資送之還平江夫人歸踰年長源示微疾
跣趺而化時順治丁亥秋某月也

汪有典曰世傳柳下坐懷不亂事非也夫坐懷即亂矣聖人若是失權衡哉且非所以全女也山陰徐渭 操閑閑公與其嫂於一室公明燭達朝事乃無有雖有不足為公良然然如長源家破國亡躬且不閤乃欲脫人於難而全其節男女之際歷三夕不為度庶幾凜々造次顛沛必於是者與豈不賢乎王與納吾之好義也雖由長源有以感之然世固有感之而不動者君子於是乎賢王與納吾

勝朝彤史拾遺記

毛奇齡

愍皇帝朝
崇正

莊烈皇后周姓其先蘄州人徙居大興父魁以醫名娶結妻丁氏生后家貧窮操作顧性貞靜居平不見

齒天啓中選信王邸妃以后進故事宮中凡選婚每選一
必以二副者陪升即中選皇太后幕以青紗帕取金玉跳
脫繫其臂不中則以年月帖子納淑女袖而侑以銀幣遣
還時神宗劉昭妃攝太后寶而中宮之政悉稟成于熹宗
懿安后懿安后疑后弱小將及其次昭妃力贊之曰今雖
弱小他日不長大邪曰冊為信王妃上即位立為皇后之
家本節畬而八典宮政務減儉裁宮中糜費不為外家乞
恩澤即歲時大臣命婦入朝賀亦賞賚必以禮時天下饑
饉府庫虛上憂勞議節用后所行合上意上甚敬之初神
廟以孝養故設兩宮百戲自宮中舊戲以及民間鬻弄無

不備至是悉裁革而獨留舊戲承應如所稱過錦戲者彷彿古優伶供俸取時事諧謔以備規諷時旱蝗中州賊大起戲者作驅蝗及流賊狀后見之徐謂上曰有此邪曰掩面泣上亦泣是日遂罷戲上薄于拜色宮中不無寵惟田貴妃者頗愛之妃見后稍踞后每欲抑之以禮會歲旦朝正妃當詣坤寧宮朝適天寒雨雪翟車止門外不即入又不令傳免久之袁淑妃車至時淑妃亦進為貴妃即傳八相見且故為好語謝之去于是始傳妃車入坐朝之朝已遽下無他言妃大恨向上泣訴妃父教之上書陽引愆而別為微詞挑之上在交泰殿與后語不合上推后仆地后

憤不食飲自戒上尋悔遣中使持貂茵賜后且問后起居
后勉為一餐上傳旨令貴妃省愆退居啓祥宮三月不召
既而后在永和門看花請召妃上不應后遽令以車迎之
乃相見如初后嚴正自處而性最仁母丁太夫人八宮必
先朝后始行家人禮后見母之朝已也而泣欲太子為謝
左右力言不可乃止後聞寇漸棘微言曰吾南中尚有一
家居蓋意在南遷也上問何從知之后不語后凡有所言
不欲盡且不欲言外多此類先是宣懿康昭劉妃者神宗
妃也賢而有年崇正改元上使之居慈寧宮掌太后印稱
太妃周后之選昭妃贊成之以是也至是歲節上必朝太

妃朝畢坐而進茶上甫就坐忽欠伸偃栲栳鼾齁徐聞太妃戎勿驚命尚衣者覆以帔左右皆植立屏息以俟有頃上覺振衣起謝曰聖祖時天下少事宮中皆晏安太妃所知也至兒子苦多着

北人呼多為多着

實難枝梧連夜省文書不

料遂困劣生太妃前不自持至此太妃泣上歸為后言后亦泣時上念寇禍茹蔬斷庖割后見上體瘁具酒肴將為上解菜上未知也出御門接瀛國夫人奏瀛國夫人者孝純太后母也瀛國野夢孝純歸語上瘁而哭囑云為我語上翼日有為上解菜者上勿却也上持奏入宮見后解菜驚詢曰汝何以為此豈亦有所聞邪曰無有外人有專之

者邪曰念先后慈在冥、尚保惜至此、后亦賢能感先后
意、乃出奏、示后、再拜舉筋相向、哭淚溢槃、櫛后生皇長子
及長平昭仁二公主、故事、太子既出閣、非上命、不朝后、偶
上坐便殿、案有急奏、太子忽以朝后、請上、歎曰、兒見母有
幾、而闕我邪、今後竟八朝、勿問也、十七年三月、都城陷、上
至宮、曰、事急矣、后即于上前、再拜自經、死、清兵定京師、世
祖章皇帝特謚曰莊烈愍皇后、與帝同葬田貴妃寢園、名
思陵

皇貴妃田氏、西安人、世行估、居揚州、父宏遇、以奢自豪、生
妃而嫵妍、故多銜女習技能、宏遇娶之、為後妻、教妃鼓琴

天啓中選妃八信王邸信王八嗣冊禮妃未幾進皇貴妃
妃敏慧善伺上意旨上寵之嘗鼓琴上問師何人以後母
對上不信妃恐上疑已踰月以他節請召母入乘間令鼓
琴上前一再行上悅賜勞之自是母出入常注宮門籍不
復禁妃善粧櫛每以新飾度宮中儀法燕見却首服別作
副髮藏髮問宮衣用紗縠襖綴諸剪繡而隱以他色如卷
畫然上冠舊綴鴉青石與珠相間妃去珠易以珠胎而嵌
鴉青于其中望之有光焉宮中燈多縷金匝西雖烜麗而
炬不外達妃乃剝燈扇每當炬去處一方以䟽綃幕之炬
影左右徹觀者稱快嘗厭宮闈過高迴崇杠大牖所居不

適意乃就廊房為低檻曲楯蔽以敝隔雜採揚州諸什器
床簾供說其中又以永巷接宮門御蓋往來必行風日中
妃令為廢薄夾棕葉覆之凡用心工巧多此類雖變易舊
制然較便故上亦聽之且嘗去小黃門之舁已輿者而易
以官婢上稱其有禮特妃頗干預每見上輒為外家乞恩
澤而宏遇以妃故官左都督交遊結納極園林舞伎之盛
朝士附勢者爭相造請每以外情輸宮禁上頗厭之先是
宮中凡令節宮人以押戴相餉偶貴妃宮中婢戴新樣花
他宮皆無有中宮宮婢齊向上叩頭乞賜上使中宮出採
辦越數百里不能得上以問妃妃曰此象生花也出嘉興

有吳吏部家人携來京而妾家買之上不悅至是妃以搆
后故上快之本欲斥妃以洩后忿會上人不食妃叩之上
曰吾欲破格用朝臣而朝臣孰可用者妃曰聞霍維華好
及上出而薦維華者適至上大怒摘妃冠斥妃啓祥宮令
省愆妃生皇三子永王及皇五子皇五子遂薨于啓祥宮
既而用后言召妃復妃禮如故而妃遂病當皇五子將薨
時兩河催餉者日三至武清侯孽子李國正訐其兄國瑞
藏禁物自莊房土地外精鏐環寶累萬之上召見國瑞諭
以輸餉國瑞辭不能上怒責之既而國瑞死有憑皇五子
為言者曰吾九蓮菩薩也上待吾家薄逝將去此皇五

子慧隨我行先是神廟時孝事慈聖皇太后有言慈聖為
九蓮化身宮中遂以慈聖像裝九蓮菩薩祀之武清即慈
聖家也至是宮中禱九蓮徹三晝夜而皇五子終不起上
悔嘆息曰竟以貪故殺此兒謚曰悼靈王而武清竟免後
上至妃宮思悼靈值寇亂甚河南諸王多被害愴念骨肉
間傷懷呼宮婢能言宮中往事者使言之曰言福王之國
時神廟鍾愛王出宮門召還者三且約三歲當入朝上屈
指曰三歲一千日但恐皇父不待耳時上年高王皇后稀
進見當大漸時猶顧視貴妃諄々以河南為念今何如矣
上嚔唏而起其後妃遷承乾宮十五年七月薨謚恭淑端

慧靜懷皇貴妃葬天壽山

長平公主誄

張宸

長平公主者明崇正皇帝女周皇后產也甲申之歲淑齡一十有五皇帝命掌禮之官詔司儀之監妙選良家詎將降主時有太僕公子都尉周君名世顯者將尊平陽以館之開沁水以宅之貳室天家行有日矣夫何蛾賊鴟張逆臣不誠天子志殉宗社國母嫺嬪慷慨死焉公主時在稚齡御劔親揮傷頰斷腕頽然玉折霄矣蘭催賊以貴主既殞授尸國戚覆以錦茵載歸椒里越五宵且宛轉復生泉塗已宮龍髯脫而劍遠蘭薰破殿蕙性折而神枯順治三

年上書今皇帝九死臣妾跼蹐高天髡緇空王庶申罔極
上不許詔求元配命吾周君故劍是合土田邱第金錢牛
車錫予有加稱備物焉嗟夫乘鷁扇引定情於改朔之朝
金犢車來降禮於故俠之第人非鶴市慨紫王之重生競
異鸞臺者樂昌之再合金枝秀發玉質含章逢德耀於皇
家迓桓君於帝女然而心戀宮帷神傷輦路重雲畢陌何
心金榜之門飛霜殺林豈意玉簫之館弱不勝悲溘焉夢
逝當扶素上仙之日跼穠李下嫁之年星逐初周芳未未
歇嗚呼悲哉都慰君悼去鳳之不留嗟沈珠之在殯銀臺
竊葯想奔月以何年金殿煎香思返魂而無術越明年三

月之吉葬於彰義門之賜莊禮也小臣宸薄遊京輦式睹
遺容京兆雖阡誰披柩館祔連像塚祇叩松閔擬傷逝於
子荆朗香空設代悼亡於潘令遺掛猶存敢再拜為之誄
云

春明夢餘錄曰公主名徽姬

史八夫人傳

汪有典

八夫人者姓李氏宛平人史文忠可法夫人之妹而公弟
可口之妻也可口早世文忠公殉國難八夫人奉太夫人
夫人居金陵浙人厲昭伯者嘗入文忠幕軀貌類文忠冒
文忠名集亡命數百人破巢縣破無為州提督平省兵擒

之堅冒文忠名衆莫辨名三夫人識認斥其妄始吞實而
八夫人有國色爲衆所規會金拜桓豫章禁旅往討駐金
陵遼官聶三媚少宰某艷八夫強爲委禽八夫人遣婢拒
之不聽詈之又不聽復使一婢奉黑漆盤進聶曰奉八夫
人命恣若所爲聶視之則一髮髻一耳一鼻也血淋漓滿
漆盤聶失措急躍馬馳去

汪有典曰嗚呼明之亡也周皇后從烈帝殉社稷後宮嬪
御視死如歸節烈之奇前古莫與比而文忠公殉難揚州
官兵相繼蹈河死者五六千人最後八夫人復以節烈聞
何其盛也抑余聞豫王之下江南也赧皇東走少保兼太

于太保總督京營戎政忻城伯趙之龍自署掌都察院事
兵部右侍郎李喬太子太保禮部尚書兼翰林院學士錢
謙益等首卒從官公侯伯駙馬數十百人爭先納款郊迎
數百里時大雨如注匍匐泥淖中王前導過麾之不敢起
得王命叩頭呼萬歲而後乃起是三台八座非以身從人
者與而謙益在東林之選也至如三夫人乳之在疚去文
忠殉難時無幾耳固已不免於血綽之傷而八夫人之抗
節卒無有樂道之者其無乃嗔此婦人非識時俊傑乎歐
陽永叔論馮道附以王凝妻斷臂事有以也夫子之傳八
夫人萍連諸要人猶永叔志也然亦書不勝書矣噫

兩女將軍傳

汪有典

沈雲英浙江蕭山人居長巷里中父至緒崇正辛未武進士為道州守備雲英性聰慧工書旁涉經史癸未張猷忠破武昌入湖南陷岳州過洞庭風作覆其百艘大怒還岳州縱火延燒遂騎而破長沙寶慶衡州湖南郡縣皆靡唯道州以至緒力戰得全既而再與賊戰馬驚仆墮於陣雲英聞父變奮呼持矛趨賊壘奪父尸還賊環搦之雲英左右支格賊莫敢傷完守八保而道州終不可破湖撫王聚奎疏聞烈帝詔贈至緒昭武將軍賜祠麻灘邑而授雲英游擊將軍仍代父為守備領兵守道州雲英隨父任適四

人賈萬策為荊州督師營中軍分守南門城陷不屈死
雲英聞夫變慟哭解職去間閔數千里出入賊壘扶襯敢
蕭山既殯遂隱居教授里中兼以書法訓後學族子兆陽
從雲英受春秋胡傳為知名士雲英年三十八而卒於今
蕭山人稱長巷沈氏有女將軍

劉淑英江西廬陵人故忠烈劉公鐸女也忠烈死黨禍淑
英時年七歲母蕭恭人陳忠烈遺書教之旁及禪學劍術
孫吳兵法莫不精曉歸同邑王藹十八而寡李自成陷京
師帝后殉社稷淑英聞變痛哭曰先忠烈與王氏皆世祿
吾恨非男子然獨不能殲此渠亮以報國仇耶散家財募

士卒得千人併其童僕悉以司馬法部署指揮成一旅然
孤軍寡援自念當寇徒死無益順治三年丙戌楚將張先
璧駐永新聞淑英名請謁淑英欲資為助則大喜開壁門
見之流涕為言指揮大義諸軍聞之無不變色却立者朝
日過先璧營報禮周視營壘閱步伐出千金犒之佐以牛
酒一軍盡驩然先璧心持兩端卒不敢赴敵且欲納淑英
為配淑英大怒即筵間拔劍將斬先璧先璧環柱走一軍
皆驚盡甲淑英叱曰若曹何怯吾一女子耳安事甲口占
詩曰銷磨鍊膽堪吞劍扶却殘瞳欲挂門大書於壁從容
北向拜曰妾將從先國母周皇后在天左右先璧悔且惧

平麾下叩頭請死淑英曰婦言不出於閫吾為國難以至
於此事之不濟天也將軍好為之跨馬去盡散其所募士
使歸田里闢一小菴曰蓮舫迎其母歸養誦佛以終身焉
汪有典曰嗚呼自光岳氣分士無全節而婦人女子往々
以忠孝貞烈著稱其亦足悲矣求尸殺寇不用城頽笑父
捐軀如浮江出蓋雲英之誥詞云爾雲英固可以無愧淑
英痛父被逮欲先死闕下母病刲股以愈庶幾孝與雲英
類然兩女子憤然敵愾卒完節以歸為尤難嗟乎是固兩
女子也哉

河東君柳如是者吳中名妓也名是一字蘿蕪美丰姿性
儼慧知書善詩律分題步韵頃刻立就使事皆對老宿不
如四方名士無不接席唱酬崇正戊寅間年二十餘矣昌
言于人言曰吾非才學如錢學士虞山者虞山聞之大喜
過望曰今天下有憐才如此女子者乎吾非能詩如柳如
是者不娶有好事者兩相傳致庚辰冬如是始虞山即筭
我聞室居之以迎其意十日落成留之度歲辛巳六月虞
山于葺城舟中與如是結褵吉服冠帶皤髻學士合卺花
燭儀禮備具賦催粧詩前後八首雲間縉紳譁然攻詩以
而褻朝廷之名器傷士夫之體統幾不免老拳滿腔載瓦

磔而歸虞山怡然自得也。稱爲緒室呼河東君建絳雲樓窮極壯麗。上列畫史。下設幃帳。以絳雲仙姥下降叱之。褻甚矣。不數年絳雲樓灾。宜也。但河東君所從來。余獨悉之。我邑盛澤鎮有名妓徐佛者。能詩善畫。蘭雖鄉鎮而士大夫多有物色之者。丙子年間婁東張西銘先生慕其名。至垂虹亭。易小舟訪之。而佛已于前一日嫁蘭溪周侍御之弟金甫矣。院中惟留其婢楊爰。楊色美于徐。而詩字亦過于徐。因攜至垂虹。余于舟中見之。聽其音。禾中人也。及長。豪宕自負。有巾幗鬚眉之論。易姓名爲柳。是歸錢之後。稍自歛束。在絳雲樓。交離文史。牧齋臨文有所檢勘。河東君

尋閱雖牙籤万軸而某冊某卷立時翻點百不失一所用
事或有誤舛河東君從旁頗為辨正故虞山甚重之常衣
儒服飄巾大袖間出與四方賓客談論踴躍若仙故虞山
又呼為柳儒士康熙某年虞山捐館嗣君孝廉弱不自振
而族黨囂悍聚百人登堂爭閔河東君曰家有長嫡義無
坐受凌削若未亡人奩內遺貲留亦無益當盡捐賂族亮
以紓家難出其箱籠千金族人攫取以歸矣明日喧集如
故河東君遣人問曰今將奚為族人曰昨日所頒夫人之
長物耳未足贍族嗣君田房廩粟獨不可分其半以給貧
婁耶嗣君惧匿不敢出河東乃密召戚故及門人素善者

又呼其僕人能幹者告之曰視族人之意如宋人割地不
盡不休計將安出咸曰嗣君懦無策也河東君曰吾有一
計可以立解全孤保家在此一舉然必爾等念府君舊德
并力相助方可行咸曰願之河東君乃出廳事見族人曰
妾之衣囊盡矣誠不足以贈期以明日置酒大會多寡惟
命府君之貲產在我不惜也衆唯々而散是夜宰猪屠羊
酒醴畢具來朝將大宴者又陰部署所約諸人于後堂衆
莫測其意筵席陳設諸色畢集密令人鎖禁門戶河東君
入內若將持券簿以出者已而投繯畢命矣其家人驚視
見夫人已死而房中聚繩索大書壁上曰并力先縛飲酒

者而後報官衆如其言出繩盡縛族入門閉無一得脫者
復吏邑令至門驗視柳夫人即子廳事窮治諸亮具服正
厥辜以上聞所司柳夫人一死而虞山之家全虞山之孤
保柳夫人一死而青樓之愆蓋夫君之大義高而品題風
月之才為不足論夫人有一死輕于鴻毛而重于泰山者
柳夫人之謂哉賢于丈夫遠矣

圓圓偶記

沈 虬

陳圓々蘓州名妓也在崇 辛巳間年十八善歌舞隸梨
園中貌端儼白皙似閨閣中人絕無青樓意態故登傷無
不羨嘆時田妃專寵兩宮不協而流氛漸逼師屢喪敗上

意不懽國戚嘉定伯周以營葬歸蘓欲得色藝雙絕者曰
母后進之以舒宵旰之憂且以分西宮之寵遂重賂圓以
北納之宮中一日上見圓問以從來且命遣還故圓仍在
周邸時吳逆得命鎮山海周餞之出女優佐觴吳屢目圓
頗屬意焉詰朝請于周周拒之有所親謂周曰朝廷方寄
以北門公何惜一女子結其懽耶周感悟時朝廷賜吳三
千金吳輒以千金為聘限迫即行未及娶也周備裝資送
吳父家未幾賊陷京邑籍諸貴家吳父亦與焉賊擁衆兵
挈吳父而東以招其子許以通侯之賞吳已允降矣因問
圓娘所在使不敢隱以籍入告吳遂按劒大怒曰大丈夫

不能保其妻室何以生為遂勒馬出關隨王師而入其父
旋又害故吳梅村圓之曲云慟笑六軍皆縞素衝冠一怒
為紅顏又云電掃紅巾定黑山笑罷君親再相見又雜感
詩云快馬健兒無限恨天教紅粉定燕山此詩史微詞也
吳旋逐寇出山西道晝夜不息尚未知圓之存亡也時都
中已索得圓載送軍前至絳州將渡河方及遂效于飛位
與晚妻匹有尊稱並輦而行自秦至蜀盪寇平逆建藩滇
中吳之顯貴近世無比而圓以一妓女傾動京師匹偶上
公吳下艷稱此圓之始末已得其畧矣以後吳之鎮滇以
至逆節二十年来久不聞圓之消息矣癸亥冬于西陵遇

縣安公公故令滇訪其遺事語及陳圖公曰有之彼處稱
邢太々非陳也述吳娶邢始末更悉意陳為 母姓而邢
其本姓也邢至王第中名最貴盛然別居一院卸鉛華並
歌舞黃冠羽衣茹素自居府中宴會皆不與吳與妻間日
同至其處談讌竟日抵暮而歸亦不留寢及府中有疑難
事費處分者求邢太々言無不立解意在排難解紛曰我
修行人做好事故內外無不重之吳之妻悍而妬亦曲順
邢意蓋邢深知妻之勢惡故退居恬淡不競 利其明哲
保身之意有過人者吳有二姬美顏色善歌舞寵冠後庭
吳征水西屬其子善視之子以他事遠行徃返兩月及歸

省視而二人俱斃矣不勝駭愕知其為晚母所殺然後知
邢之潛身遠害為不可及也敗亡之後吳闔門被戕矣凌
敲叢臺懽樂不終此白首之女冠焉知不為綠珠之墮樓
盼之之終于燕子邢不可攷矣吳門好事者但知圓之喪
亂中遇合之奇吳之功成後罷幸之盛且有為一女子闕
天下興廢之嘆而不知其辭滌八道于繁華中急流勇退
吳之知進而不知退以致喪敗負愧一女子多矣故為之
記

